

帶

經

堂

詩

話

帶經堂詩話卷十五

漁洋山人

考證門三

氏籍類

酉陽雜俎載北齊房君豹山池在濟南有詩云風淪歷城水
月倚華山樹云云初不詳何許人案隋書房彥謙傳彥謙事伯
父樂陵太守豹竭力四時珍果口弗先嘗乃知豹卽彥謙之
伯父元齡大父行也古夫于亭雜錄

唐末詩人韓定辭仕爲鎮冀深趙等州觀察判官尙書祠部
郎中兼侍御史爲王鎔聘劉仁恭與馬彧倡和所謂崇霞臺
上神仙客學辨癡龍藝最多者事載全唐詩話按安陽集重
修五代祖塋域記定辭乃忠獻王琦四世伯祖忠獻五代祖

又賓稱庶子府君歷仕鎮帥王紹鼎景崇鎔三世有子二人
長定辭次昌辭昌辭仕爲鼓城令卽忠獻王高祖也東坡嘗
書前詩而云定辭不知何許人豈未考其家世耶

唐有兩裴迪一天寶詩人與王維杜甫友善一爲王鐸辟租
庸招納使朱溫鎮宣武辟節度判官旣篡位拜右僕射溫自
岐還將吏皆賜迎鑾叶贊功臣入見溫目迪曰叶贊之功唯
裴公有之見五代史雜傳

已上池北偶談

嘉興魯嘗杜工部詩年譜一卷謂甫生于先天元年壬子卒
于大歷五年庚戌趙子櫟杜年譜一卷謂生于開元元年癸
丑錢本作二年非沒于大歷六年辛亥先是呂汲公始創爲年譜嘗書
成于紹興癸酉譜說蓋沿汲公之舊而趙則謂汲公之譜生
歿所值紀年與紀年所值甲子皆有一歲之差近錢先生收

齋之譜獨遵呂說

并錄一

居易錄

費著撰蜀杜氏族譜云杜翊世以死節顯其世祖甫來

蜀依嚴武家青城者實宗文裔世孫準皇祐五年第進士宰
綿竹以卒子翊世徙成都紹聖元年第進士官至朝議大夫
通判懷德軍靖康元年死節特贈正議大夫命官其後十人
五子慄忱以賞得官孫逸老俊老廷老曾孫光祖大臨以忠
義遺澤得官今猶稱忠義杜云著此說不知何據坡詩有鬚
文無有字云問道華陽版籍中至今尙有城南杜則子美有後于
蜀其信然耶

唐詩人劉方平河南洛陽人家世最貴政會事高祖太宗爲
洪州大都督贈戶部尙書封渝國公諡襄四世至襲開元中
以功臣後賜進士第官東阿縣令子藻全成方平皆有文方

平子符戶部侍郎贈司徒八子崇龜崇珪等皆仕宦崇珪子
岳後唐吏部侍郎贈司徒子溫叟宋初御史中丞子照贊善
大夫燿龍圖閣直學士燿子几登第忱爲監司子唐老右正
言溫叟嘗求退太祖曰候選有守道正直如卿者即可代燿
嘗獨對明肅太后謂曰知卿名族十餘世欲一見卿家譜恐
吾同宗也燿對曰不敢后數問度不可免因陞對佯爲風眩
仆而出蓋世有風節如此唐中葉詩人後嗣昌盛者莫如盧
綸而方平歷五代迄宋科名德業相繼又爲過之

并錄一

居易錄前卷記唐詩人河南劉方平累代閭閻之盛按唐書河

中盧綸子姓貴盛功名著聞唐之詩人亦罕其比綸子四人

簡能簡辭宏正簡求皆有文名登進士

李衛公對文宗云云

簡能字子拙

司封郎中簡辭字子策歷戶兵刑三部侍郎工刑二部尙書

兼御史大夫忠武山南二軍節度使宏正字子強歷工部侍郎戶兵二部尚書武寧宣武二軍節度使贈右僕射簡求字子臧歷工刑二部尚書兼御史大夫義武隴西二軍節度使太原尹以太子太師致仕贈左僕射唯簡能不登六卿其子知猷歷兵部侍郎戶工二部尚書右僕射太子少師兼太師檢校司空簡求子汝弼仕後唐歷官戶部侍郎贈兵部尚書簡求子嗣業禮部郎中其子文紀仕後周官至中書侍郎平章事

集古錄跋沈傳師道林嶽麓寺詩云唐侍御姚員外二人之詩不見不知何人按侯鯖錄姚詩不復見之今得唐侍御詩題云儒林郎監察御史唐扶其詩卽所云壁間杜甫原少恩者也此篇與崔珣韋蟾諸篇俱載楊用修集永叔顧未之見

何哉 已上居易錄

唐相國段文昌史云西河人褒國公志元之後志元本臨淄
人文昌徙居荆南又云荆蜀皆有先祖故第又云先人墳墓
在荊州其稱臨淄人以先世本籍故而與鄒平無涉不知何
以封鄒平公今鄒平縣西北地名段家橋謂是文昌故居傳
會不足信也子成式柯古罷江州刺史居襄陽與李商隱溫
飛卿倡和故號漢上題襟集然柯古著酉陽雜俎多言齊州
事如長白山沙彌二桃之類皆在鄒平

香祖筆記

附錄蜀道驛程記宣城縣古郡地隸襄陽府山川頑劣而多產才士宋玉王逸段成式
皆生其地今叙師故宅在城南故宣城西柯古吾鄉臨淄人又云梁鄒平其父文昌封
鄒平郡公今鄒平有地曰段橋傳為文昌舊居而宣城木香村亦云段氏故宅所未詳
也又唐處士王士源漢思清遠深鑒文理常造元倉子九篇撰孟浩然詩序其文清綺
如魏晉間人亦安雅

丹鉛錄極稱唐劉綺莊桂楫木蘭舟楓江竹箭流一篇其詩

果不減太白升菴博雅亦未詳綺莊何許人也按吳中人物志劉綺莊崑山尉研窮古今博考傳記作類書一百卷號崑山編其平生著作最夥而所傳止池北偶談作祇此一詩可惜也漁洋詩話

杜詩近時馮紹正能畫鷺鳥樣歷代名畫記紹正開元中官少府監八年爲戶部侍郎喜畫鷹鵠雞雉談賓錄云高力士父喪左金吾衛大將軍陸伯獻少府監馮紹正二人於喪前被髮而哭甚於己親人皆笑之卽是人也

元白長慶集皆有老劉白謂夢得元謂太真非一人也

盛唐詩人多有贈康洽之作最傳者李頎所謂西上雖因長公主還須一見曲陽侯蓋指楊國忠暨秦虢輩也後長慶中白居易作忠州刺史亦有贈康詩云殷勤憐汝無他意天寶遺民見漸稀天寶至是已歷六朝而康猶在則祿山之亂流

落西蜀至元和長慶之時亦已老矣又案段安節樂府雜錄有康老子者是長安富家子常與國樂游處家產蕩盡後以半千從一姬買得冰蠶絲褥遇波斯胡酬直千萬不經年復盡尋卒伶人嗟惜之遂製此曲亦名得至寶似又別是一人已上古今亭雜錄

段拂吳激皆米元章之壻拂字去塵元章有潔癖見其名字喜曰旣拂矣又去塵真吾壻也以子妻之拂南渡後仕至參知政事激字彥高入金爲翰林學士以詩樂府知名與蔡松年齊名號吳蔡體

老學叢談載陸務觀姚將軍趙宗印二詩惜不得姚名字今渭南文集有姚平仲傳庶齋豈未睹之耶

葉石林詩話載吳縣寇主簿國寶一絕句云黃葉西陂水漫

流籊籊風急滯扁舟夕陽暝色來千里人語鷄聲共一邱語
甚工且云冠徐州人嘗從陳無已學予考後山集有贈國寶
二絕句云承家從昔如君少得士於今孰我先口擬說詩心
已解世間快馬不須鞭又有和冠十一詩十數篇所謂畫樓
著燕春風裏楊柳藏鴉白下東者是也又有贈冠荆山詩蓋
冠之字陳又有冠參軍集序稱冠氏兄弟曰元老元弼元弼
名其仕許州參軍蓋國寶諸父云

并錄二

居易錄

予嘗愛宋人冠國寶詩黃蘗西陂水漫流籊籊風急滯

扁舟

云云

後考之陳無已集始知爲彭城人及后山之門讀羅

端良願新安志言彭門冠鈞國家藏李廷珪下至潘谷十三
人製墨東坡先生臨郡日取試之因爲書杜詩十三篇各于
詩下書墨工姓名而品次之蓋亦國寶兄弟行嗜古而好事

者也

全上

山谷甥徐師川洪龜父輩人皆知之呂居仁紫微詩話

記楊道孚克一張文潛之甥少有才思爲舅所知元符初榮

陽公

呂希哲

謫居歷陽道孚爲州法曹掾嘗從出遊以職事遽

歸遺公詩云雨綠霜紅郭外田山濃水澹欲寒天參軍抱病

陪清賞一檄呼歸亦可憐此詩之妙不減徐洪也道孚極喜

李義山詩嫦娥應悔偷靈藥碧海青天夜夜心以爲作詩當

如此學亦居仁云又石林詩話記寇國寶一絕云黃葉西陂

水漫流蘼條風急滯扁舟夕陽暝色來千里人語鷄聲共一

邱又云寇徐州人久從陳無已學此詩尤佳從蘇黃門庭中

來固自不同正石林所云文字淵源有所自來亦不難辨也

豫章別集有題道孚畫竹所謂人物英秀有外家風氣者卽

克一也

坡詩有琴聰蜜殊謂僧思聰仲殊也放翁筆記云思聰大觀政和中以琴遊權貴間遂還俗官御前使臣仲殊自縊以死參寥尤爲坡公所喜政和中老矣亦還俗又墨莊漫錄載呂溫卿爲浙漕屢起大獄復欲網羅參寥參寥本名曇潛東坡改之曰道潛呂索牒勘驗竟坐刑之還俗編管兗州

筆記云錢勰字穆范祖禹字淳本皆一字予按古如爰絲房喬顏籀劉父之類皆一字字也今文士有寶應陶澍字季萊陽董樵字樵二人皆以布衣遊于都門初不相識予爲介之曰二君非但詩筆相當卽一字字亦絕對也二君遂賦詩定交按龍川別志有隋時道士屈突無爲字無不爲晁景迂一字伯以父見陸務觀文集劉敞劉攽兄弟字伯貢父仲原父

見歐公所作原父墓誌前涼張天錫字公純嘏見十六國春秋此又三字字也陶一字昭萬有太原傅山字青主一字公之佗

宗枏附識靜志居詩話袁小修序頭黃齋詩有云今人字皆兩字而京字獨一字自東漢以下無之矣然自漢以降如顏之推字介李曇字雲劉乾字天羅靖字禮房元節字喬顏師古字籍張巡字巡孫晟字鳳李餘徐倫字堅毛欽字傑正雖悉數也按京乃明汝南諸生泰編之字

宋桑世昌蘭亭考載三米蘭亭本有米尹仁尹知二跋注尹仁卽友仁又范文度摹刻石本有溫公跋旃蒙單闕厲陬壬戌晦涑水司馬某公實觀注溫公會字公實吳虎臣漫錄載曾子固懷友一首其曰介卿者卽王介甫少字也研北雜志云張曲江初名博物翟耆年猶史載李龍眠洗玉池篆款云元祐唯五年庚午正月初吉舒李叔時公麟韓文公慈恩塔題名稱李翺翺之見本集石守道有讀安仁學士詩一篇後

邨詩話云石曼卿舊字安仁

已上池北偶談

坡公之有斜川人豔稱之而集不傳唯傳其颶風賦及試誦

北山移爲我招琴聰數語耳

蟹尾文無而集下二十四字

谷之甥徐師川洪駒

父輩皆著名而世

蟹尾文無世字

不知其後人之盛後邨云愚陵尤重

谷詞翰擢其甥至執政至茂陵而其後益蕃子邁子晞皆顯

融伯庸尤貴重克昌者最後出爲名公所稱示予甲豪丙豪

春風雜詠過秦詩字其名曰紹谷集曰後谷甲豪已有鼻祖

熙豐氣骨丙豪而後則漸入元祐建中境界使加以

原本作一今從蟹尾文

年駸駸黔宜晚筆矣坡谷之後南渡以後皆昌大又能以文

章世其家豈非天哉

附錄居易錄以道作蘇叔黨墓誌云先生師定武誦知英州繼貶惠州遷儋耳漸徙

廉州永州選手萬死不測之險獨叔黨侍先生以往來於先生飲食服用凡生理晝夜

寒暑之所須者一身百爲而不知其難翁板則兒築之翁然則兒薪之翁賦詩著書則

兒更端起拜之爲能須臾樂乎先生者也其初至海上也爲文一篇曰志隱效於先生

前先生攬之曰吾可以安于島旁矣先生因欲自爲廣志隱以極窮通得喪之理嘗命叔黨作孔子弟子別傳則固有以處其子矣先生不至永州稍還仕版居陽羨不幸疾不起叔黨兄弟葬先生於汝州郟城縣之小義晉山遂家穎昌仍從湖陰營水竹數畝名之曰小斜川自號爲斜川居士時一至京師自得於醒醒而徜徉一世之外所遇者與談靡不傾盡遺次大笑謔浪間節槩存焉若世未嘗有小人也

宣和五年十二月乙未以暴疾卒鎮陽行道中年五十有二悲夫

洛陽名園記濟南李格非文叔譔易安之父也家今章邱縣北之臨濟記有紹興中張琰德和序首曰山東李文叔又曰女適趙相挺之子亦能詩上趙相救其父云何況人間父子情識者哀之云云而常熟毛氏刊本乃訛作華州李廌譔廌字方叔乃蘇門六君子之一且陽翟產非華州又訛之訛也同時李端叔之儀著姑溪集趙郡人以草范忠宣公遺表爲蔡京所惡編管太平州亦文忠客也

文昌雜錄單父龐文英著宋人說部之佳者予家有寫本文英官禮部郎官丞相穎公之子也後山集有贈舅氏龐大夫

詩云傳家聲烈三公後貯腹平生萬卷餘謂文英也後山爲
穎公外孫又有龐謙孺字祐甫南渡後客吳興著白蘋集見

吳興掌故

亦見蠶尾文

后山寄山谷書云正夫有幼子明誠好文義每遇蘇黃詩文
雖半簡數字必錄藏以此失好于父幾如小邢矣乃知向歆
無足怪者正夫謂丞相挺之明誠與婦易安居士撰金石錄
后山與丞相僚壻也小邢謂恕子居實

張伯雨句曲外史集外詩一卷中有魏國趙夫人管君挽詩
落句云千秋鄉中名不沒墓有通兒書老銀自注歐陽率更
子通自書母夫人銘夫人諱老銀

緱長弓太湖中人通文史善鑄鐵冠如意常爲楊廉夫鑄鐵
笛楊贈詩云湖中冶師緱長弓有如漢代陶安公

已上居易錄

虞山詩揮毫對客曹能始簾閣焚香尹子求子求名伸蜀宐
賓人予過敘州詢其後人無有得其遺詩及泝峽記略一卷
於其門人樊星煒樊云蜀亂尹先生死之有胡生約之者攜
此集避兵芒部胡亦死此集流落一彝生家久之敘州士人
某客遊其地一日與論先生詩彝生搖手曰浪得名耳出此
集則塗抹幾徧士人遂乞取以歸而予略爲論次刻之樊字
子景老儒也子求止有一孫名卷字若魯亦樊云

池北偶談

予鄉文獻舊家以臨朐馮氏爲首初閭山公裕居遼東從賀
醫間學中正德進士官止副使歸居青州有四子唯健舉人
唯重進士官行人唯敏舉人官通判唯訥進士官光祿寺卿
唯訥字汝言最有文名著古詩紀風雅廣逸諸書唯健字汝
強以詩名唯敏字汝行詞曲爲明第一手唯重字汝威名稍

遜伯叔季而其子子咸以進士官給事中夢天帝以韓魏公爲其子遂生文敏公琦官至禮部尚書號文章經濟大儒光祿曾孫易齋公溥 本朝官少傅文華殿大學士兼刑部尚書數代皆有集傳於世

居易錄 并錄一

漁洋詩話

馮氏自閬山先生裕起家進士以詩名海岱間有四子

唯健唯重唯敏唯訥皆有詩名唯敏兼工詞曲唯訥纂古詩紀風雅廣逸諸書有功藝苑唯重之孫則文敏公琦也萬歷中以經術推重館閣文毅則唯訥之元孫云

宗補案文毅乃相國易齋公諱前條

云光祿曾孫此云元孫偶然誤記

花林啗在雲門山南益都山水佳處也山泉翁詩云山藏柳市無車馬水隔桃源有子孫馮宗伯北海鍾司空龍淵皆屬和翁嘉靖間進士名澄甫官御史壽光人文和公珙之孫

漁

古大千亭雜錄

余極喜山泉翁山藏柳市無車馬水隔桃源有子孫之

句池北偶談載之矣然不詳爲何許人闕壽光縣志乃知山

泉名澄甫姓劉氏字子靜文和公明之孫正德戊辰進士官

御史有直聲與弟淵甫范泉皆工詩歸田後與馮聞山裕黃

海亭

卿

諸老爲海岱吟社其叔

銳

號西橋八歲通五經成化

中以神童召見文華殿以應累官太常少卿與何李康邊諸

公相倡和有西橋集

品誼類

劉脊虛盛唐詩人之傑李華作三賢論論脊虛與元德秀蕭
穎士曰劉名儒在京下常寢疾太尉房公時臨扶風聞之通
文不寐謂賓從曰挺卿日若不起無復有神道尚書劉公每

詣與談歎曰聞劉公清言見皇王之理矣又云元罷魯山終于陸渾劉避地逝于安康蕭歸葬先人歿于汝南無復下壽云脊虛學行蓋不僅詩人之冠冕惜不槩見于後世而所傳五言亦止十四篇新舊唐書皆不爲脊虛立傳與韋蘇州同

一憾事

脊虛字挺卿
今亦無知者

并錄一

漁洋詩話劉脊虛字挺卿其詩超遠幽邃在王孟王昌齡常建祖詠伯仲之間考其人蓋深於經術不但辭華也李華三賢論曰劉名儒史官之家兄弟以學著稱述易詩書春秋禮樂爲五說條貫源流備古今之變尚書劉公每有勝理必詣與談終日忘返殷直清有識尚恨言理少對未與劉面常想見其人高適達夫落落有奇節皆重劉者也按唐書儒學文苑皆不爲脊虛立傳而全唐詩話唐詩紀事亦略之故詳於此

詩話卷十五

品誼

十

崔信明楓落吳江冷五字初唐所少信明吾鄉益都人也以五月五日午時生有異雀數頭五色畢備鳴于庭樹初仕隋爲堯城令竇建德欲引用之族弟敬素爲建德鴻臚卿勸以立事信明曰昔申胥海畔漁者尚能固其節吾終不能屈身僞朝遂隱太行山貞觀中應詔舉爲秦川令卒信明不獨才名冠一時而大節毅然尤爲可書其自負詩過李百藥非蹇傲也鄭世翼何許人乃敢肆其輕薄耶

具區志止載麴信陵投江禱雨文余讀洪文敏萬首絕句載信陵詩三首一過真律師舊院一酬談上人海石榴一出自賊中謁恒上人詩皆不工而信陵篇什賴此尚存後世按信陵貞元元年鮑防下及第以六年爲望江令白樂天秦中吟云身歿欲歸葬百姓遮路岐攀轅不得歸留葬此江湄則信

陵卒于官未嘗遷秩審矣不知其何時陷賊豈未第以前事

邪已上香祖筆記

余嘗謂唐宋詩人馬戴爲冠其行誼亦不可及據言記載佐大同軍幕許棠往謁之流連數月但詩酒而已忽一旦大會賓友出棠家書授之啓緘乃知潛遣一介卹其家矣此事亦古人所少

古夫于亭雜錄

司馬文正公集中載和安石二詩如安石明妃曲云漢恩自淺胡自深公則云妾身生死知不歸妾意終期寤人主和烘蝨云醯醢聚理固然爾輩被擣我當坐直如水火柄鑿之不相入而君子小人之用心亦可見矣

池北偶談

附錄此條前後段司馬文正公爲中丞奏彈王安石言非行爲王制所錄非口良臣實爲民賊安石亦云自新法之行始終以爲不可省司馬君實也張子韶云溫公之門一傳而得劉器之再傳而得陳瑩中介甫之門一傳而得呂惠卿再傳而得蔡確三傳而得章惇四傳而得蔡京五傳而得王黼

題跋古人書畫須論人品品格高足爲書畫增重否則適足爲辱耳葉石林詩話載王摩詰江干初雪圖末有元豐間王珪蔡確韓縝章惇安惇李清臣等七人題詩詩非無佳語但諸人名字千古而下見之欲唾此圖之辱爲何如哉余少嘗語汪鈍翁云吾輩立品須爲他日詩文留地步正此意也每觀鈴山集亦作此歎

附錄香祖筆記予嘗謂詩文書畫皆以人重蘇黃遺墨流傳至今者一字無金章惇京下豈不工書後人糞土視之一錢不值所謂三代之直道也永叔有言古之人率皆能書獨其人之賢者傳遂遠使顏魯公書雖不工後世見者必寶之非獨書也詩文之屬莫不皆然宗穆附識柳南隨筆新城王阮亭先生自重其詩不輕爲人下筆內大臣明珠之制壽也崑山某公先期以金箋一幅請于先生欲得一詩以侑觴先生念曲筆以媚口貴君子不爲送力辭之先生歿後門人私謚爲文介卽此一事推之則所以易其名者前無愧云

蘓州滄浪亭本吳越廣陵王元璩南園以蘓子美之故遂名吳中不知此園後歸章惇大觀末又賜蔡京京詩八年帷幄

竟何爲更賜南園寵退師是也二人爲南園之辱甚矣前乎
子美則王元之宰長洲日攜賓客飲于此有詩云他年我若
功成後乞取南園作醉鄉雖託空言要是爲滄浪增重也南
渡後歸韓蘄王庶幾一涵章蔡之恥

鄒忠介公

元標

與慈溪姜松檠太常

應麟

以氣節相許嘗從奉常

曾孫西溟見公與姜公數柬聊錄其一云翁丈與吾輩俱老
年雖稟得厚未可輕恃日間只用一味如臨深淵如履薄冰
養德養身並切要諸世間事何足齒牙天奉林泉俟我老政
是大賜敢不拜嘉又二詩錄其一云曾向承明並直廬當年
意氣重璠璣登車已負澄清志盛事猶存痛哭書雞黍喜來
論舊雨雲山聊自共閒居相看爾我俱垂老且向衡門賦遂
初讀之可想見前輩道義交契之厚

已上居易錄

襲故類

唐詩佳句多本六朝昔人拈出甚多略摘一二爲昔人所未
及者如王右丞積水不可極安知滄海東本謝康樂洪波不
可極安知大壑東春草年年綠王孫歸不歸本庾肩吾何必
游春草王孫自不歸還家劍鋒盡出塞馬蹄穿本吳均野戰
劍鋒盡攻城才智貧結廬古城下時登古城上本何遜家本
青山下好登青山上莫以今時寵能忘昔日恩本馮小憐雖
蒙今日寵猶憶昔時憐颯颯秋雨中潺潺石溜瀉本王融潺
湲石溜瀉絲蠻山雨聞白髮終難變黃金不可成本江淹丹
砂信難學黃金不可成如何此時恨嗷嗷夜猿鳴本沈約嗷
嗷夜猿鳴溶溶晨霧合孟襄陽木落雁南度北風江上寒本
鮑明遠木落江渡寒雁還風送秋郎士元暮蟬不可聽落葉

漢桓帝時童謠云小麥青青大麥枯誰當獲者婦與姑丈夫何在西擊胡吏買馬君具車請爲諸君鼓隴胡杜大麥行全襲其語兵車行句調亦本此

柏梁詩大官令云枇杷橘栗桃李梅語本可笑而後人多效之如韓文公陸渾山火云鴉鵂鵃鷹雉鷓鴣蘓文忠公韓幹牧馬圖云騅駟駘駢駞駝駟李忠定公題李伯時畫馬云騅騶駟駘駞駞黃陳后山上蘓公云桂椒枏櫨楓柞樟林艾山資中行云鐘鐺鼎鬲匱盤盂韓子蒼詩萐藕蓴芋蘘荷葑然皆施於歌行耳若鄧林鴻鵠鵬鵬鵩鵙鰭鯪鱖鯢鰕魷

元陳伯通宣慰雲中人跛而眇自述云肢傷一體婁師德目眇三分李雁門先兄西樵吏部甲辰歲以磨勘事下西曹兄談笑賦詩有句云縱跛尚如習鑿齒有腸終類佛圖澄較陳句又勝之

亡友唐耕塢工楷法詩最清婉嘗有句云殘花野蕨圍荒砦破帽疲驢避長官蓋本徐文長詩疲驢狹路愁官長破帽殘衫拜孝陵然宋王君玉已云疾風甚雨青春老瘦馬疲牛綠

野深

并錄一

漁洋詩話宣城唐祖命

允

故明中書舍人也亂定後有詩云殘花

野蕨圍荒砦破帽疲驢避長官頗似徐文長疲驢狹路愁官長破帽殘衫拜孝陵

閭古古

爾

在濟南有詩云四圍松竹山當面一望樓臺水半

城雖本白太傅燈火萬家樓四面星河一道水中央實難甲乙也劉後邨亦云地占百弓全是水樓無一面不當山予少時在濟南亦有句云郭邊萬戶皆臨水雪後千峯半入城今前集不載

予改官翰林侍講時潘川唐濟武

費

太史寄詩云蠟燭五侯

新制誥鞦韆三影舊邸中語雖巧特工妙後讀王威寧詩有云江浙老成新運使戶曹公道舊邸中乃知前輩已有此句法但工拙異耳

予贈徐隱君東癡

夜

詩云先生高臥處柴門翳苦竹雪深門

未開邨雞鳴喬木日午炊烟絕吟聲出茅屋

云

故友葉文敏

公方最愛之而不解雞鳴喬木之句以爲江南若見雞上木

鳴則以爲妖孽矣然古詩已云雞鳴高樹顛陶詩云雞鳴桑

樹顛而諺亦有云雞寒上樹鴨寒下水此皆目前習見語

詎

已上池北偶談

世傳李易安詩露花倒影柳三變桂子飄香張九成葉石林避暑錄話云子瞻于四學士中最善少游常戲云山抹微雲秦學士露花倒影影柳屯田李蓋襲蘇語

居易錄 并錄一

分甘餘話余官祭酒日有送陳子文歸安邑詩云月映清淮何水

部雲飛隴首柳吳興按葉石林云山抹微雲秦學士露花倒影柳屯田又李易安云露花倒影影柳三變桂子飄香張九成或謂余句法本此竊自謂青出於藍後當有知之者

宗補附識芷齋述晉廬先生云御亭一回望風塵千里昏梁庾肩吾亂後行經吳御亭作起語也漁洋南海集留別詩起句亦似本此而忘其語意之不倫耳宜爲秋谷所譏矣今案談龍錄南海集首章留別諸子云蘆溝橋上望落日風塵昏云云不識謫宦遷客更作何語次章與友夜話云寒宵共酒一笑失窮途窮途定何許非所謂詩中無人者耶竊謂前條所指良是玩次章結處窮途乃屬友人宮贊并此譬之則題中明著微余澹心處士語未免掉以輕心已

唐國史補謂漠漠水田飛白鷺陰陰夏木嘯黃鸝乃右丞竊
取李嘉祐語論者或爲王諱以爲增漠漠四字便是點鐵成
金手段此亦嚙語然此事往往有之予門人太倉崔舉人華
字不雕貧而工詩嘗有句云溪水碧于前渡日桃花紅似去
年時余在廣陵作論詩絕句四十首舉此二句云江南腸斷
何人會只有崔郎七字詩後汪鈍翁在京師亦有句云溪水
碧于前渡日桃花紅似去年人謂非取崔前語乎汪于崔亦
前輩也香祖筆記

宗補附識別裁集論老杜登高作云前人謂中聯俱可截去二字以此爲病試思落木
蕭蕭下長江滾滾來復何語而不成議論如是愚按水田一聯固非此比然味漠漠陰
陰四字覺情景如畫下五字栩栩欲活點綴成金故非妄歎雖爲嚙語竊謂未然且與
夫子亭雜錄以登字益見蕭散之言自相矛盾矣崔齋云兄此段與石林詩話及韻語
陽秋語
意暗合

東坡廬山詩云溪聲卽是廣長舌山色豈非清淨身萬歷中

董思白

其昌

宗伯寄先大司馬太師府君詩云饒歌卽是廣長

舌大纛豈非精進幢全襲坡語稍變其意耳時府君以兵部

尚書視師行邊故云

分廿餘話

近似類

山谷詩云子瞻謫海南時宰欽殺之飽喫惠州飯細和淵明

詩吾友黃州杜濬亦有詩云堂堂復堂堂子瞻出我眉早讀

范滂傳晚和淵明詩二作說盡東坡一生并識之

鴈尾文并錄

池北偶談

黃岡杜濬晚號葵邱老人少時詠蘓長公堂堂復堂堂

子瞻出我眉早讀范滂傳晚和淵明詩合肥龔端毅公酒間

常擊節誦之以爲二十字說盡東坡一生真不可及

漁洋詩話

杜于皇詠坡公云堂堂復堂堂子瞻出我眉蚤讀范滂

傳晚和淵明詩龔端毅每誦之以爲二十字說盡東坡一生

余因憶宋人一詩云東坡謫嶺南時宰欲殺之飽喫惠州飯
細和淵明詩二作殆不易軒輊

李衛公作步虛引云仙家女侍董雙成桂殿夜寒吹玉笙曲
終却從仙官去萬戶千門空月明河漢玉女能鍊顏雲輶往
往在人間九霄有路去無跡曩曩天風吹珮環許彥周詩話
歎爲人傑王安石題畫扇云玉斧修成寶月圓月中仍有女
乘鸞青冥風露非人世鬢亂釵橫特地寒此詩之工不減贊
皇也鄉人長山張某者工畫尤好寫毛女圖予嘗得之欲題
一詩憶二公前詩瑟縮而止己未歲同故友施侍讀愚山闕章
訪華陰王徵士無異法於昊天寺出唐子華水仙圖共觀予
爲題長句中有云青峯出沒高歷歷海天萬里迴春潮六銖
衣輕逐風舉飛龍決起橫烟霄摹寫畫中意態頗謂傳神意

欲髣髴二公於文句之外耳

居易錄

白樂天詩吳孃暮雨瀟瀟曲自別江南久不聞極是佳句虞
山錢牧翁宗伯詩東風誰唱吳孃曲暮雨瀟瀟關禁城予亦
有二絕句云波遶雷塘一帶流至今水調怨揚州年來慣聽
吳孃曲暮雨瀟瀟水閣頭七載離筵喚奈何玉壺紅淚斂青
蛾瀟瀟暮雨南陽驛重聽吳孃一曲歌

時聞西窗琴凍折三兩絃孟東野詩也淨几橫琴曉寒梅花
落在絃間楊慈湖詩也松枝落雪瀟琴絃倪雲林詩也鱗魚
出水浪花圓北固樓前四月天忽憶戴顓窗戶裏櫻桃風急
打琴絃予在廣陵時詩也此詩今不存集中

已上香祖筆記

汪鈍翁號吳江絕句云江上西風滿棘枝夕陽遙映去帆遲
不須便作思歸計且爲鱸魚住少時徐昌穀詩淼淼太湖秋

水闊扁舟搖動碧琉璃松陵不隔東南望楓落寒塘露酒旗

二詩風味何其相似

漁洋詩話

老杜詩白鳥去邊明坡公詩貪看白鳥橫秋浦不覺青林沒
晚潮余少登京口北固山多景樓亦有句云高飛白鳥過江
明一時卽目不覺暗合

分甘餘話

句意類

張祜詩人生只合揚州死禪智山光好墓田元遺山擬作兩
句云人生只合梁園死金水河頭好墓田蓋哀金宮人之被
俘擄者亦如宋末孟鯁折花怨鮑輓重到錢唐諸作諷謝太
后北行之意與張詩語同而意義迴別也

漁洋文

應璩與滿公琰書云高樹翳朝雲文禽蔽綠水甚似魏晉間
人五言

范仲闇

文在

金陵嘗云鐘聲獨宜著蘓州用唐人姑蘇城外

寒山寺夜半鐘聲到客船如云聚賢門外報恩寺豈非笑柄

予與陳伯璣

允衡

論此因舉古今人詩句如流將春夢過杭州

滿天梅雨是蘓州二分無賴是揚州白日澹幽州黃雲畫角
見并州澹煙喬木隔絳州曠野見秦州風聲壯岳州風味各
肖其地使易地卽不宜若云白日澹蘓州或云流將春夢過

幽州不堪絕倒耶

并錄二

居易錄

地名各有所宜故友陳伯璣嘗語予姑蘇城外寒山寺

夜半鐘聲到客船若作金陵城外報恩寺有何意味此雖謔
語可悟詩家三昧予因廣之云流將春夢過杭州滿天梅雨
是蘓州白日澹幽州黃雲畫角見并州之類皆不可移易予
二十年前在廣陵有句云綠楊城郭是揚州好事者至取爲

圖畫若云白日澹蘓州流將春夢過幽州有不捧腹絕倒者耶宋人謂五月臨平山下路藕花無數滿汀洲改六月便不佳亦此意也

漁洋詩話陳伯璣常語余姑蘓城外寒山寺夜半鐘聲到客船妙

矣然亦詩與地肖故爾若云南城門外報恩寺豈不可笑耶

余曰固然卽如滿天梅雨是蘓州流將春夢過杭州白日澹

幽州風聲壯岳州黃雲盡角見并州澹烟喬木隔緜州皆詩

地相肖使云白日澹蘓州流將春夢過幽州不堪絕倒耶

李廣射虎沒石飲羽荀子解蔽篇已云冥冥而行者見寢石

以爲伏虎也唐詩山風吹空林颯颯如有人荀子已云見植

林以爲後人也

并錄一

分甘餘話岑詩山風吹空林颯颯如有人黃庶詩山精水怪衣薜

荔天祿辟邪眠莓苔余游廬山亦得句云薜荔衣怪樹山風
恐行人各寫一時所見而句法相似然岑亦本古詩羅帷卷
舒似有人開意非剽也

漢光武諸書詔最有情態西京所無沿及明章亦然光武賜
侯霸璽書云崇山幽都何可偶黃鉞一下無處所古勁絕似

漢人詩句又范書語往往有似詩者如柴門絕賓客

楊震傳僕

妾盈紈素

楊乘傳

之類是也光武微時嘗歎曰仕宦當作執金

吾娶妻當得陰麗華亦似漢人樂府語

已上池北偶談

武侯與張裔書去婦不顧門妾韭不入園似漢魏樂府

隴蜀餘聞

杜詩從人覓小胡孫一首第三句云舉家聞若駭下云爲寄

小如拳結云許求聰慧者童穉捧應顛殊不貫宋劉昌詩蘆

浦筆記云合移童穉句作第四移爲寄小如拳作結則一篇

意義渾全亦成對偶甚有理而錢牧翁不采其說想未見此書耶然此詩殊不成語

居易錄

字義類

往在京師吳門文黠爲予作讀書圖汪茗文題詩云借問鄰家競笙管一絢能絡幾多絲後改作一絢絲絡幾多時一日讀馬永卿懶真子云諺云一絢絲能得幾時絡喻小人逐目前之樂也絢字當作綸太元經絡之次五曰蜘蛛之務不如蠶一綸之利綸音七侯反與絢音同

韓致堯詩白玉堂東遙見後令人評泊畫楊妃李子田云評泊者論貶人是非人也今作評駁者非近諸本或作斗薄或轉訛陡薄殊無意義萬首絕句本作評泊當猶近古

唐詩空聞明主提三尺宋人云三尺乃歇後語此說非是予

按漢書高帝紀吾以布衣三尺取天下師古曰三尺劍也韓
安國傳所云三尺亦同而俗本或云提三尺劍劍字後人所
加耳提三尺三字全用班書語安得謂之歇後

秀水朱竹垞簡討

辨

云杜詩老去詩篇渾漫興今本皆訛作

漫興非也予考舊刻劉會孟本千家注本果皆作興字趙云

孰佳句而語驚人言其平昔如此今老矣所爲詩則漫興而

已無復著意於驚人也劉後邨集跋陳教授杜詩補注亦云

或信筆漫興

云

然近日虞山錢宗伯本仍作興字略無辨證

又云倪雁園

集

簡討有宋刻十家宮詞內王建太平天子朝

元日作朝迎日亦新

宗樞按漫興之說詳見靜志居詩話及敬業堂續集並齋述諸廬先生云朝迎日卽國
語朝日之意今倪刻宋本宮詞亦不多觀高廬先生會贈十一冊凡四卷前有朱太史

竹垞
序

杜牧之弔沈下賢詩云一夜小剪山下夢水如環佩月如襟
坊刻訛作小孤與本題無涉按吳興掌故剪山在烏程縣西
南二十里易曰震爲萋萋花蒂也說卦山之東曰萋此山在
福山東故名福山又名小剪山與剪山相連接唐詩人沈亞
之下賢居此予鄉華不注不作跗解亦與萋同義

劉節之

孔和有詩云虛堂微月影玲瓏

玲瓏二字出揚子法言玲瓏

來年仍小泊未須催曉唱瓏瓏瓏瓏二字出揚子法言瓏瓏

其聲者其質玉乎則商玲瓏作商瓏玲亦何不可之有

已上池北偶談

梁皙次先生於古文不多作其有作必合古人矩度而於禪
悅文字尤善嘗共讀杜詩至分減二字諸家注皆不之及先
生謂出華嚴經其淹博皆此類

韻尾文

宗樞按詩中用禪語注家博引釋藏類然矣然其字見諸傳記者亦復有之居易錄云
董師張字退周湖州人號博雅所著吹景集一條云佛典中未師二字見史記樂毅傳

祖師見漢書丁姬傳居士見禮記及韓非子魏志管寧傳侍者見國語及漢書管寧見史記樊噲傳本作姪注音省長老見漢書宰官見郭象莊子注某甲見周禮鄭元注及應劭漢官儀布施見國語供養見諸中散集煩惛見河上公老子注惛字見方言言西京東都二賦煩字見釋名石拔據可謂詳博然其為典調合耶抑耶取耶

偶與學子言詩用字不可臆為杜撰卽如古人名字司馬長卿長字無平聲相如相字無仄聲如字或作上聲馬援援字無平聲曹操操字無平聲之類今人率通融以就已便非也又如樂毅稱樂生賈誼稱賈生司馬長卿稱馬卿李膺稱李君阮籍稱阮公嵇康稱嵇生山濤稱山公王導稱王公郝惜稱郝公謝安石謝靈運謝朓皆稱謝公庾亮稱庾公王凝之稱王郎袁粲稱袁公江淹稱江郎徐陵自稱徐君杜甫稱杜公李白稱李生孟浩然稱孟公韓愈稱韓公韋應物稱韋公白居易稱白公歐陽修稱歐公蘇軾稱蘇公又謝惠連謝朓皆稱小謝宋祁稱小宋蘇轍稱小蘇杜牧稱小杜之類皆有

所本卽是出處不可假借若杜甫稱杜生李白稱李公知復爲誰耶

嘗讀耶律文正詩花落餘香著莫人蓋本朱淑真詞無奈春寒著摸人語適讀宋彭器資汝礪鄱陽集有湖湘道中見梅花絕句云滴葉開花妙入神酥盤憶看北堂春瀟湘此日堪腸斷隨處幽香著莫人乃前此矣唐人唯元白集中多用此等字未暇考長慶集也

宋楊案著莫等字宋元人詩中未易遽舉就愚所憶及者如孔平仲懷逢來閣云深林鳥語留連客野徑花香著莫人飲夢錫官舍出文君西子小小畫堂云一樽美酒留連客千載香魂著莫人味此三聯則其義亦曉然矣孔與彭鄱陽亦同是元祐紹聖間人也

韓退之於莽鹵纏徽帖妥等字多倒用皆有據非杜撰推之玲瓏之爲瓏玲噌吰之爲宏窅孟浪之爲浪孟皆然若魯直以西巴爲巴西則趁韻耳

已上居易錄 并錄一

全上韓退之詩多倒用成字蓋本諸三百篇孫季昭示兒編所拈如中林中谷中河中路中田家室裳衣衡從稷黍瑟琴鼓鐘斯螽下上羊牛甥舅孫子女士京周家邦鼎鼎息偃之類不一而足

宗補附識野客叢書漢學詩話曰字有顛倒可用者如羅綺綺羅之類方可縱橫唯韓愈孟郊輩才藻故有慨慷之語後人亦難放效僕謂慨慷二字退之東野亦有所訓前後名人如左太冲張文昌王昌齡岑參等皆用此語古人顛倒用字又不特慨慷而已悽慘作悽悽悽悽作悽悽參商作商參皆隨韻而協之耳又如綢繆二字張敞則曰內飾則結繆綢近韓詩箋注云元和詩人皆好顛倒如盧仝有榆柳白居易有摩揣退之以參差爲差參又有湖江白紅慨慷之句大抵謂字兩義者可謂字一義者不可愚按倒用成字隨韻而協三百篇已下唯漢魏及唐人始足據依如方注云云尚自鶴突蓋以西巴爲巴西雖在山谷未免越韻耳

樂府碧玉破瓜時而談苑載呂洞賓謁張洎贈詩云功成應在破瓜年洎後以六十四卒破瓜者二八也老少男女皆可稱破瓜亦奇

僅字有少餘二義唐人多作餘義用如元微之二云封章諫草

繁委箱笥僅逾百軸白樂天哭唐衢詩著文僅千首六義無
差忒小說崔煒傳大食國有陽燧珠趙佗令人航海盜歸番
禺僅千載矣甘澤謠陶峴傳浪跡怡情僅三十載據言曲江
之宴長安僅于半空玉壺清話南唐先主傳吳越災遣使唁
之資帑幣糧錙僅百餘艘之類至宋人始率從少義迄今沿
用之

宗枬附識芷齋云案東坡先生題晉人
帖有僅千軸之語是亦作僅字解矣

康熙辛亥宋荔裳疏在京師一日招龔芝麓大宗伯梁蒼巖
大司馬及予兄弟飲梁家園子予首倡偶用纈字明日梁問
予纈字之義對不能悉按潘氏記聞云唐明皇柳婕妤妹適
趙氏性巧慧鏤版爲雜花打爲夾纈代宗賞之命宮中依樣
製造又西河記西河婦女無桑蠶皆著碧纈韻書但言文繒

耳已上香祖筆記

兄考功

士祿

作憶萊子雜詩二十篇有潮勢汨三韓之句或疑

汨字所出汪編修

琬

曰杜詩吳楚東南坼坼字汨字正以獨

造爲奇

南海鄭露集

香祖筆記無集字有湛若嶠雅四字

有詩云峻嶺極金鄰

筆記作隣

摩天見

九真

筆記有初見鈔本作金鄰出吳都賦凡十一字

按筆記無按字有後讀二字

升菴集云張籍蠻中詩銅

柱南邊毒草春行人幾日到金隣金隣交趾地名水經注所

謂金隣清渚是也隣與鄰通今刻本作隣非

已上漁洋詩話

帶經堂詩話卷十五

帶經堂詩話卷十六

漁洋山人

考證門

四

音訓類

宋人謂漢唐人多以阿字爲發語如阿嬌阿誰阿家阿房宮之類則阿房之阿亦當作去聲又山谷詩語言不韻無阿堵阿字反作平聲予蜀道集詩有句云綠苔未央瓦黃土阿房宮本此

宗杲附識並齋述藹先生云按阿字但有平入二聲此言去聲俟考愚謂阿房之阿亦作發語辭籍所未解案爾雅倫高阿邱小雅止于邱阿正義曰邱阿非二物阿卽邱之曲中也玉篇廣韻俱烏何切倚也曲也邱也近也史記秦始皇紀先作前殿阿房注括地志云秦阿房宮亦曰阿城在雍州長安縣顏師古曰阿近也以其去咸陽近故號阿房又並齋云篆字記始皇築阿房宮十五年始成以在山阿之旁故名歷考諸書未可作去聲讀也若阿堵作平聲或從倚也曲也之解第山谷所本未能詳審爾

中興中酒二一中字音予嘗言之適讀王敬美集一段附著於

詩話卷十六

音訓

一

後云中酒二字始見徐邈傳中聖人義如中著之中而音反從平聲樊噲傳項羽既饗軍士中酒顏注云飲酒之中也不醉不醒故謂之中義宜從平聲而音乃竹仲切何也然古人詩如氣味如中酒之類皆從平聲無竹仲一讀又宋王觀國學林云老杜新數中興年百年垂死中興時中并去聲烝民詩序曰任賢使能周室中興焉陸德明音義曰中丁仲反觀國按中字有鐘衆二音音鐘者當二者之中首尾均也音衆者首尾不必均但在二者之間爾此中興之中所以音衆又如中年中葉中天中塗中詘之類皆當從衆

并錄三

池北偶談中興中字去聲杜詩漢家新數中興年楊仲宏詩一代人才頗中衰此字槩無平聲中酒中字平聲如氣味如中酒濁賢清聖時中之皆平聲此字槩無去聲近人用二字往往

交誤姚福云中酒作去聲於義爲長蓋中有中傷之義又今兩京有治中呼作平聲非是周禮天官凡官府都鄉州及都鄙之制治中受而藏之鄭司農曰中者要也謂其職治簿書之要也

居易錄

中酒之中平聲中興之中去聲然又有不盡然者王

野客叢談引漢書樊噲傳軍士中酒注竹仲反齊己詩穠低似中陶潛酒作去聲祖此予按葉石林建康集次韻程伯禹次章云漢道中興此一時作平聲石林號博雅必有所本

全上

梅聖俞宣州雜詩有云一過響山畔常思路中丞中丞之中亦作竹仲切僅見於此

能奴登切又乃帶切獸名熊屬足似鹿說文曰能獸堅中故稱賢能而彊壯稱能傑也音奴登切字書三足鼈曰能音乃

帶切阮嗣宗詠懷詩誰云君子賢明達安可能與萊哉相叶
阮瑀七哀詩身盡氣力索精魂靡所能與來萊相叶則是賢
能之能亦乃帶切叶平

蘇湖蕭尺本

從雲

以畫擅名江左常作杜律細一卷以爲杜律

無拘體穿鑿可笑而援據甚博聊記一二條於此以資拊掌
如江草日日喚慈生草音騷詩勞心慙慙又勞心草草皆平
騷之轉音也盤渦驚浴底心性底卽低說文下也隋薛道衡
使江南作人日詩首二句人笑之曰是底言低同輕忽之也
獨樹花發自分明發音飛左傳建而不施音霏荀子議兵篇
引作載發注發施也分去聲爾疋律謂之分郭璞讀也此應
作仄者若杜社日詩陳平亦分肉當作平然不合律亦作仄
聲蓋此字元有二聲十年戎馬暗南國暗音庵書高宗諒闇

鄭注作梁庵小室曰庵閉戶曰闇不明曰暗異城賓客老孤
城客音開元曲凡如青雲客讀書客俱作平聲孤音故如姑
作鼓沾作估籀作股例渭水秦川得見否得音登公羊傳登
來也注登得也則得可云登易豫繇豫大有得勿疑朋盍簪
簪音尊得叶之又一雙白魚不受釣白音杯七命燕脾猩脣
髦殘象白靈淵之龜萊黃之駘叶魚音勇荀子禮論絲萬縷
嬰禮記作魚曰魚躍沸池鶻亦音勇易貫魚叶宮人寵不平
聲沈韻載十一尤受音收傳元詩悠悠建平皇澤未流朝選
於衆乃子之授未聞細柳散金甲散平聲生南反元詩酒戶
年年滅山行漸漸難欲終心懶慢轉覺意闌散潘岳笙賦輟
張女之妙彈罷廣陵之清散散叶彈諸仿此

李子田舉唐人詩用字音與今人別者如劉夢得停杯處分

不須吹分作去聲王建每日臨行空挑戰羅虬不應琴裏挑
文君挑皆上聲包佶曉漱瓊膏冰齒寒冰去聲段成式玳牛
獨駕長擔車長上聲予按白氏長慶集中此例尤多如請錢
不早朝請作平聲四十著緋軍司馬司入聲紅闌三百九十
橋十讀如譙爲問長安月如何不相離相思必切燕姬酌蒲
桃燭淚粘盤壘蒲桃蒲上聲三年隨例未量移量平聲金屑
琵琶槽琵琶仄聲之類予田皆未暇及又劉夢得幾人雄猛得
寧馨寧平聲拋却丞郎爭奈何爭去聲獨孤及徒言漢水纔
容舫纔去聲盧綸人主人臣是親家親去聲讀如靚徐鉉騎
省集莫折紅芳樹但知盡意看自注云但平聲予按老學菴
筆記云但姓音讀如檀又宋陶穀尖簷帽子卑凡厮厮入聲
宋文安三十六所春宮館鄜州軍司馬也好畫爲屏亦如白

詩又猗覺寮記舉李商隱可惜前朝元菟郡菟去聲九枝燈
檠夜珠圓唐彥謙燈檠昏魚目釋文檠音景前漢蘓武傳注
音警唐人如此尚多未能枚舉又陸游燒灰除菜蝗蝗仄聲
拭盤堆連展連上聲今山東製新麥作條食之謂之連展連
讀如輦東坡詩左元放放作平聲司馬相如如作上聲

并錄一

宗枏附識勇參云野客叢書以蒲桃之蒲爲入聲柳亭詩話司馬司字作仄聲老杜殊
錫曾爲大司馬武黃門唯有白鬚張司馬白樂天四十著緋軍司馬亦止于夏官用之
餘司罕見正齋云老學菴筆記世多言白樂天用相字多從俗語作思必切如爲問長
安月如何不相離是也然北人大抵以相字作入聲至今猶然不獨樂天老杜云恰似
春風相欺待夜來吹折數枝
花亦從入聲讀乃不失律

居易錄

吹景集又載唐人詩用字異音有予池北偶談中廣李

子田丹浦窾言所未及者補錄數則于此韓退之岳陽樓詩
軒然大波起宇宙隘而防防音訪東都詩新輩只嘲評評音
病元微之東南行微俸封魚租封音奉店臥詩一生長苦節

三省詎行怪怪音乖嶺南詩洞照失明鑒鑒平聲夜池詩高
屋無人風張幕張音漲又苦思正旦酬白雪旦音丹又雁思
欲回賓自注思上聲白樂天仁風扇道路陰雨膏閭閻扇平
聲膏去聲李義山石城詩簾冰將飄枕自注冰去聲陸魯望
海客施明珠湘蕤料淨食自注料平聲

全唐詩話唐詩紀事并載馬賁贈韓定辭詩云燧林芳草綿
綿思盡日相携陟麗譙別後巉嵒山上望羨君時復見王喬
按字書嵒音務顏氏家訓云柏人城東北有孤山闕駟九州
志以爲舜納於大麓卽此山世俗或呼爲宣務山予嘗爲趙
州佐共太原王邵讀柏人城西門內碑碑是漢桓帝時縣人
爲令徐整所立銘云上有巉嵒山王喬所仙方知此巉嵒山
也巉字遂無所出務字依諸字書卽旄邱之旄也旄字字林

一音忘付反今依附俗名當音權務耳入鄴爲魏收道之收
大嘉歎其作趙州莊嚴寺碑銘云權務之精卽謂此也予按
此則馬詩當作莫毫反耳

并錄一

漁洋詩話馬彥贈韓定辭詩別後巘嵒山上望羨君時復見王喬
按顏氏家訓云柏人城東北有孤山關駟九州志謂卽大麓
世俗呼爲宣務山余嘗爲趙州佐同太原王邵讀柏人城西
門內碑碑是漢桓帝時爲令徐整所立銘云上有巘嵒山王
喬所仙巘字遂無所出務字依諸字書卽旄邱之旄也入鄴
爲魏收道之收大嘉嘆其作趙州莊嚴寺碑云巘務之精謂
此也按此則馬詩當作莫毫反定辭卽忠獻曾祖行東坡書
此詩乃云不知何許人亦失於考據矣

劉貢父詩話云司馬君實論九旗之名旗與旂相近緩急何

以區別小雅庭燎夜向晨言觀其旂左傳龍尾伏辰取號之

旂當爲芹音耳康熙己未御試博學鴻儒施愚山侍講閏章

卷閣擬一等上親闕定名第以旗字押韻偶誤書旂遂改

置二等亦由施素讀二字不甚分別故也

宗神附識柳南隨筆案旗字入支韻周禮司常所掌熊虎爲旗又釋名熊虎爲旗將軍所建象其猛如虎與衆期其下也旂字入微韻周禮交龍爲旂又釋名旂倚也蓋兩龍相依倚也乃知旗旂本爲二物亦不同韻人自忽過耳若楊升菴轉注以旂字叶真文等韻此蓋據宋人劉賁父之說然如他北偶談第十四卷所載不言旂字本音但據賁父之說若旂字當直音芹者則又誤後學不淺也

崑山顧寧人炎武詩有云落日江頭送伍員秋風隴上別徐君

偶來圯上逢黃石便向山中禮白雲竊疑員字舊作王問切

唐人語曰令君四俊苗呂崔員是也後見吳曾引春秋左氏

傳伍奢子員陸德明釋文音云平聲乃知顧詩用韻有據又

如馬援援字作延絹切無作平聲者宋王景文詩云直翁謂史

相
浩
自了平生事不了山陰陸務觀放翁見之笑曰我字務觀

乃去聲如何把做平聲押了此雖諛語亦可爲用字不詳出

處者戒貞觀年號及陸務觀俱去聲今人皆讀平聲

宗栢附識勇參云務觀之觀既作去聲然則少游之名亦當作去聲讀矣

响屧音訓皆作去聲予向有金山寄友人詩憶君楚澤佳風

日也上响屧九面山或以爲誤按常熟顧充仲達字義總略

云响屧一字三音平聲鉤樓上聲莒旅去聲勾陋又按無可

和尚通雅响共子居侯果羽古后四切屧龍朱郎侯隴丑郎

豆四切史記音苟樓猶龕從龍從可平可上也又張謂長沙

土風碑五嶺南指三湘北流鄰連滄浪邊遙响屧亦平讀也

宗栢附識字有異音自須詳核如華山之華經典釋文戶花反又戶化反廣韻作舉注西嶽名也呼瓜切又戶化切玉篇戶瓜切又戶化切今人或但知其一爾又案居易錄張說西岳碑云西岳太華山者常少陰用事萬物生華故曰華山如此則與吾濟華不注山同音義故華山有平去二讀又柳南隨筆古人詩中用番字往往平仄互見如昌

黎筭詩云庸知上幾番山谷云一雲社公雨數番花信風此作平聲用老杜云會須上
番看成竹元微之云飛舞先春雪因依上番梅此作仄聲用又上番二字或謂應切竹
說今觀微之句知又不必拘而錢圓沙解杜詩謂上番猶上緊也然則番字是虛字矣
而微之又何以用對春字乎即可以証其說之謬矣又云支韻靡字亡池反音靡繫也
與靡通易中孚我有好爵吾與爾靡之是也又散也禮少儀國家靡敝是也他若封靡
披靡娉靡妖靡後靡妙靡綺靡猗靡之類並應讀上聲入紙韻又疑字在支韻音宜在
質韻則音通毛詩克岐克嶷以就口食疑與食叶也又支韻脂字鄰其切音離理也而
史記孝文本紀之祝釐如淳曰福也賈誼傳之受釐徐廣曰祭祀福祥也並音禱與禧
同又魚韻響字羊諸切音余稱美也御韻舉字余據切音豫美稱也兩音分死活故朱
子於四書諸響字獨注誰毀誰舉如有所響者兩舉字為平聲而他處不注又齊韻齊
字前題切音臍平也整也而禮記月令火齊必得內則食齊養齊齊飲齊陳誥並音
去聲即劉字之省也當入霽韻而玉藻趨中采齊陳誥音慈他書有竟作采茨者以記
所云采齊即指楚茨之詩也此又當入支韻又支韻斤字舉欺切音與巾同而毛詩斤
斤其明斤字朱子音去聲讀如僅字爾雅釋訓云斤斤察也故毛傳解亦如之與平聲
作斧類及斤兩解迥別又觀字在寒韻音官在翰韻則音貫盡物在前而自觀之此
觀字當平聲讀如仰觀縱觀相觀遊觀旁觀之類是也又有以示人而使之來觀此觀字
當去聲讀如大觀貞觀京觀容觀甲觀壯觀之類是也又陽韻行字寒剛切音杭列也
而史漢大父行丈人行之行字又當讀去聲入藻韻按漢書蘇武傳漢天子我丈人行
也顏師古云行音胡浪反杜詩王孫丈人行並老見飄零又云豈如吾甥不流宕矣相
中郎丈人行皆仄用又商字內從八為尸張切音傷入陽韻而商字內從十為丁歷切
音的人錫韻詩東方未明註疏云商書緯謂刻為商古今韻略引士昏禮云日入三商
為昏此商字與商字迥別又青韻庭字唐丁切音亭門屏之內也而莊子逍遙遊大有
運庭陸德明經典釋文云庭勛定反運庭謂激過也按此當讀如聽字入敬韻又聽韻
占字職贍切音詹視兆問也而口占二字則當入霽韻作去聲讀音職按漢書陳遵傳

遵馮凡口古書數百封註云古隱度也口隱其詞以授吏也又朱博傳口古檄文頗師
古並音之膽反又通雅唐王劇當五王出閣劇名五吏分古亦與口古同義音言不起
草也音亦當讀去聲特摘以告學者俾知取正於
唐韻廣韻集韻韻補等書而無為俗學所誤云

詩常棣兄弟鬩于牆外禦其侮每有良朋烝也無戎劉原父
七經小傳云戎疑當作戍戍亦禦也吳才老補音云務字古
人讀作蒙疑侮當作戾以叶戎童子問戰朱子云戎汝二字
古人通用是叶音汝也如南仲太祖太師皇父整我六師以
修我戎亦叶汝也予按三說當以原父為長

已上池北偶談

附錄若易錄宋時制科以詞賦試士凡用經釋音以首釋為證用史釋音以末釋為證
徐鳳少監代嗣王謝賜玉帶表用禮記乎尹二字以尹為平聲乃用第二音有司謂其
失結見葉韻翁
四朝聞見錄

盤洲集和景盧野處解嘲詩園池如此休言小但放芻蕘雉
兔行但字注平聲與徐騎省莫折紅芳樹但知盡意看同尾
音字

文有二公皆精說文之學也

樂府拂舞歌有獨漉篇一作獨祿一作獨鹿宛委餘編子史
文選訓解云罍麓小網也音獨鹿按古辭云獨漉獨漉水深
泥濁蓋因水邊所見以起興漉祿鹿三字舊俱無解則作網
義釋亦通

汎字說文引爾雅云西至于汎國汎西極之水也府巾切杜
牧送孟遲先輩詩小溪光汎汎自注普汎切宋黃仁傑夔州
苦雨詩汎月不虛為朽月今年賴得是豐年汎音怕平聲東

方朔傳令壺齟老柏塗塗與汎同注云丈加切

并錄一

宗楷附識字彙補汎即立切音幘通以水勢也汎
涉巴切怕平聲秋分後遇王謂之八霑曰汎月

古夫丁杜牧詩小溪光汎汎宋黃仁傑詩汎月不虛為朽月今

亭雅錄

年賴得是豐年楊用修云汎怕平聲又丈加切案正字通普
八切攀入聲爾雅西極于汎國汎西極水名又水相激聲韓

愈詩獠江息澎汎與泝同張衡南都賦流湍投濺砢汎聊軋

注音八汎有平去入三聲

宗柳案汎字玉篇彼銀切廣韻府中切集韻悲中切並音邪又與泝同廣韻泝拜切集韻會泝拜切並音泝又音八切攀入聲是音平去入三聲也至汎字集韻派或省作汎札色切音側漏汎水勢音義與汎字無涉上條首作三汎字疑汎字之譌次條汎與泝同引南部賦注音八乃六書本義八音背分異也非轉爲布按切之音訓也讀者詳之又案上條注普汎切汎字疑亦譌勇參云考全唐詩作普八切

門人太原閻詠寄予書云此間有一僖父自謂精通小學問詠今代詩人誰爲第一詠以吾師新城公對渠云吾家少陵詩賓客減應劉應爲人姓當讀作平聲何新城公作仄聲用詠不能對歸質家尊家尊云皆可用也此字正爲左傳國語應爲武王之子所封之國陸氏宋氏無音故黃公紹韻會於蒸部應字曰人姓陰時夫韻府於徑部應字曰人姓非平仄兩用之證乎亦猶吾鄉之枚乘漢書無音故子美作仄聲枚

乘文章古是也太白又作平聲八月枚乘筆是也安得是李
而非杜是杜而非李乎伍子胥之員讀作運亦讀作云故陸
魯望詩賴得伍員騷思少未聞以令公四俊之謠而病其不
識字也徐自笑曰吾作新城公桓譚得否百詩博聞強記漢
唐注疏皆能舉其詞此其緒餘耳然予詩用應劉只作平聲
彼云作仄用者不知其何據也

宗補案應爲人姓未有作仄聲用者廣韻於蒸部下注曰當也又姓出南頓本自周武
王後左傳曰邦晉應韓武之穆也漢有應曜隱于淮陽山中八代孫劬集解漢書於證
部下注曰物相應也又音膺本極分明乃陰氏蒸部下所注與廣韻無異而於徑部下
復引左傳邦晉應韓之文且歷舉古人某某是仍混而一之矣朱太史竹垞謂時夫韻
府學每笑其舛陋然猶識字云云
似此援引淆訛烏容據以爲證耶

蕭相國封鄼鄼二音一音贊者在南陽一音嗟者在沛班孟
堅泗水亭銘云文昌四友漢有蕭何序功第一就封於鄼孟
堅漢人本朝故事必不誤且相國沛人自合封沛舍沛之贊

而遠食南陽之鄧安所取乎而王楙野客叢書據唐書劉晏傳釋文以駁孟堅之非且歷引楊巨源姚合賈島諸人詩作嗟字用者以爲皆誤謬矣按劉肅大唐新語云蕭何封鄧侯先儒及師古以爲南陽筑陽之城筑陽今屬襄州竊以封功臣當就本土張良封留是爲成例何須穿鑿更制別音此言得之矣七修類稿云沛國者何始封邑南陽者何子孫所封

已上居易錄

明秦人趙統伯一驪山集云韻書五噫噫本平聲楊眉菴莫解梁鴻五噫歌趙大洲梁君五噫今安否皆作去聲誤按字書噫音依恨聲又音監飽食氣滿而有聲也則依音爲是
簦簪之簪有平上二讀元次山能帶簦簪全獨而保生蘓子美松江觀漁詩擬來隨爾帶簦簪謝幼槃嚴陵詩身前萬事

詩話卷十六

音訓

九

一 等省皆在青韻今小本詩韻止收等字誤

亦見聲已上香祖筆

宗輔附識勇參云大唐新語曰漁具總曰等省漁服總曰被有。省音平聲與生相協今唐書音釋乃作蔽挺切誤矣故韻子美松江觀漁詩擬來隨爾帶等省作平聲右見能收聲漫錄櫛案等字作平聲廣韻亦不收愚檢集韻等字在四十靜紐下注云等省也而平韻無之蓋不獨廣韻爲然也漫錄謂與生協亦祇據元結傳自釋語其作平聲入九青韻御定康熙字典注中載櫛舜欽句外又有黃庭堅秦觀陸游詩云

盤山釋拙菴訪宋牧仲中丞於吳中一日會滄浪亭唱和

字韻拙菴押衲袈近讀唐人李羣玉惱僧自澣詩常聞天女

會玉指散天花莫遣春風裏紅芳點袈裟則袈字從木作去

聲唐人用字必有据依惜向來未之知也案袈裟本作髦髦

葛洪始改今字從衣

髦與袈音同 古天子亭雜錄

名物類

唐會要嶺南節度使徐浩奏十一月二十五日懷集縣陽雁來乞編入史徐楨卿詩陽月隨陽雁過從塞上來陳子龍以

爲無出改爲陽鳥蓋不覩會要耳

唐人閻防詩
陽雁時平楚

貝吉多樹枝榦皆左旋甚奇古望之如畫枯木二月葉始生
三月作花五出如木筆邊白肉黃外紫氣馥郁畧如梔子瓣
亦左旋其葉較菩提尖而大紋理如繡可作書按酉陽雜俎
云貝多出摩伽陀國有三種一多羅婆力叉貝多一多黎婆
力叉貝多三

疑當作一

都閣婆力叉貝多卽西域記之多羅樹也

杜詩吾知多羅樹却倚蓮花臺

并錄二

居易錄

嶺南貝吉多樹無根可活昔在廣州劉都督顯招飲署

中堂後有此樹予戲折一枝手植寓館時方雨一昔鬱茂因
署數字楣間以紀歲月系詩云貝葉無根插短籬一宵春雨
發華滋他年誰續羊城志記取漁洋手種時今南海集不載
追記于此

漁洋詩話 粵東有貝多樹余嘗於劉將軍署見之從者誤折一枝
余惋惜携歸使院植諸階墀值雨一昔而活菁蔥可愛余題
詩壁間云貝葉無根插短籬一宵春雨發華滋他年誰續羊
城誌記取漁洋手種時今二十餘年計已成園矣

宗樞附識愚嘗不解六十花甲之義皇華紀聞中言之甚明因貝多樹而類及之鐵樹如棕櫚餘甚奇古葉而不華在廣城提學公署見之按王濟南舟云六十花甲子以鐵樹開花而名此樹遇六十年方開花昔官橫州親見此樹在一指揮圃中其大者洪武十年正統九年宏治十七年三開花矣今當於嘉靖四十二年再花云

素馨花藤本叢生花白如粟舊產花田今移海幢寺南地名
沙園邨鬻花人先一夜摘其蓓蕾貫以竹絲傍晚晚入城鬻于
市閨閣晚粧用以圍髻花在髻上始盛開芳香竟夜先見西
熊有茉莉詩云花向美人頭上開可移贈也又有黃素馨一
種簪之頗有風韻而香不及南方草木狀作耶悉茗花

宗樞附識勇參云王機邨先生南唐宮詞自注
宮女素馨者喜插白花即名其花曰素馨花

木棉俗名攀枝花樹高數十丈春月作花殷紅如錦照映數里其絲搖颺如柳花可絮茵褥或混稱刺桐者非

佛桑混稱朱槿亦非

花而後葉予在峽山寺見一株時孟夏葉長而花尚爛熳與葉紅碧相間或又謂葉先于花則年豐花先于葉則年荒故黃棠詩有只愛青青不愛紅之句其說不足據又有樹頭絲以吉貝苗接烏柏根收花最多

高雷間山中有藥樹猶獐采其汁以傅弩箭機阱鳥獸值之無不立斃蓋惡物也唯山有半夏則其毒解按漢唐宮殿有藥樹二株唐詩云藥樹監搜可得知李紳追昔遊集云新昌宅書堂有藥樹一株長慶中于翰林院西軒移得今則長成名之天上樹詩云白榆星底開紅甲珠樹宮中長紫霄

樂府有渾脫舞明皇雜錄歷代名畫記皆云公孫大娘善舞

西河劍器渾脫故杜詩云云注家多不詳渾脫之義朱中丞浣水續談云唐長孫無忌以烏羊毛爲渾脫氈帽時人效之號趙公渾脫予于役三關次太子灘隔岸羣獐來見亂流而渡見有騎一物浮水面者問之曰渾脫也蓋取羊皮去其骨肉令不透水以氣管吹之宛然羊也獐人乘以渡水若壺然蓋渾脫其肉骨而製之故以爲名趙公之帽義亦應爾愚因憶南卓羯鼓錄載杜鴻漸嘗於嘉陵江樓月夜以柘枝擊羯鼓見岸上羣羊皆低昂盤旋舞應節奏則舞名渾脫亦當以羊取義頃聞奮威將軍王進寶自河西恢復蘭州時賊盡拘船于河東王乃縫羊皮爲囊以濟師須臾飛渡蓋中丞所見卽此製也

并錄一

居易錄

渾脫之義予向詳之皇華紀聞闕李中麓

開先

太僕塞上

曲一首云黃河萬里障邊隅黠鹵年來謀計殊不用輕帆并
短棹渾脫飛渡只須臾與朱乘器中丞河上楮談所記略同
李自注云脫音駝然後知渾脫舞渾脫帽皆當作平聲也

予有粵東之役家司成公遣覓砂床問之粵人無知者閱河
上楮談乃知出辰州麻陽萬山中其坑深不可測砂有床取
砂人携燭入且行且鑿有行數日不獲一床者床在石中色
如白玉砂如箭出床上床有寬尺許者去其砂床尚可直十
餘金取爲屏瑩潔可愛砂所出處紅白相錯過江湖必裹以
狗皮藏之米中不然卽有蛟龍之患高似孫謝人惠砂床詩
云宜州丹砂產陽谷不比辰溪如箭鏃素霓深抱赤城霞猩
紅半染于闐玉蓋宜州亦有之矣

已上皇華紀聞

葉石林舉東坡獨看紅葉傾白墮白墮人名此正如吳下饌

驚設客云請共過食右軍不知此例正多如山谷詩春網薦琴高琴高亦人名皆自曹瞞唯有杜康作俑

并錄一

居易錄

天邊趙盾益可畏水底右軍方熟眠昔人有湯燐王羲

之之謔子讀張文潛宛邱集此首乃仲夏詩字句小異云雲間趙盾益可畏淵底武侯方熟眠若無一雨爲施澤直恐三伏便欲然謂龍眠則亢暘不雨武侯云者如言臥龍也此謔當更云湯燐諸葛丞相耳與右軍無涉又相傳有送鷺及梅子札云湯燐右軍二隻醋浸曹公一瓶傳以爲笑故友董侍御文驥玉虬之子常遺風雨梅子喜其名甚雅戲爲口號謝之云吳中五月梅黃雨想像千林舶趙風珍重遺來香軟齒不須將醋浸曹公

韓致堯詩云
商歌越梅酸

黃詩春溪蒲葺沒鳬翁樂府化爲白鳬如老翁急就篇春草

雞翹鳧翁濯顏師古注翁頸上毛也象鳧在水中引濯其毛也黃詩益出此與老翁義別漢郊祀志鳧翁雜五采文又北齊武成帝湛小字鳧翁北齊童謡云中興寺內白鳧翁四方側聽聲囋囋道人聞之夜打鐘

左公蘿石手書一帖云乙酉年五月客燕之太醫院從人有自市中買得古刺水者上鐫永樂十八年熬造古刺水一礮淨重八兩礮重三斤內府物也揮淚賦此玉泉山水遠流帝陵前蘆溝橋下水其流聲濺濺瓶中古刺水製自文皇年製之扁天府元石流清泉列皇飲祖澤旨之如羹然逆寇犯天紀守陴臣匪賢君不棄社稷鼎髯垂自天經筵赤金几斤斧生炊煙況茲天府水寧不落市廛小臣侍筵者睹水心如煎再拜嘗此水含之不忍咽心如南生柏

自注予卿墓柏大小數百株枝皆南向在韓城予曾

爲文記之

淚似東流川捧之以南旋跪詠豐芑篇

并錄一

居易錄

左先生蘿石有古辣水詩一篇予在揚州日通州有老

布衣古姓者自號古辣泉初未詳其義云何辟寒錄云古辣

本賓橫間墟名以墟中之泉釀酒埋之地中日足取出名古

辣泉予同年孟縣薛理丞大武

奮生

自號老峯按薛老峯乃嵩

山之峯名也

顧太初說略引鄭康成顏師古崔豹諸說辨罽罽之制甚詳
以爲闕屏間刻鏤鳥獸雲氣疏通連綴之狀唐蘇鶚引子虛
賦罽罽彌山證罽不當爲網顧以爲非是予按柏梁詩上林令
云走狗逐兔張罽罽則罽罽之爲網明甚罽罽之爲網戶正
以其象類網而借用耳

宗枬附識男參述謂盧先生云日知錄有論罽罽一條當並觀之愚按日知錄罽罽字雖從罽其罽罽也參考諸書當從屏說然山人引漢詩自屬明據特網戶與闕屏其說

尚未

融隔

元人竹枝詞云黃魚上得青松樹阿儂始是棄郎時然本草
陶注鰻鱧魚能緣樹食藤花雜俎鰻魚能上樹贊曰有足若
鰻大首長尾其啼如嬰緣木弗墜宋祁方物略曰鰻魚出西
山溪谷及雅江狀似鰻有足能緣木

予蜀道詩有熊館四時陰之句亡友葉文敏訥菴方以為射

熊館乃漢上林館名不可借用非也夢溪筆談云熊於山中
行數千里悉有跬伏之所必在石巘枯木中山民謂之熊館
訥菴或偶忘之耳又有句云東道連胸臆按胸臆音潤蠢而
顏師古地理志注音劬予從顏音

蜀人謂衣紐曰船蓋方言也陸處士嘉贈予詩有跣足到門
衣不船之句用此谷水談林釋杜詩天子呼來不上船乃引

方言鑿矣

并錄二

居易錄海寧陸冰修嘉淑浙西名宿也康熙己未庚申間客京師每與宣城施愚山侍講梅耦長庚毘陵邵子湘長蘅夜過予邸舍劇談至三鼓始各散去陸有詩紀事云科眺到門衣不船船襟紐也或以杜子美飲中八仙歌天子呼來不上船亦作此解謬甚菽園雜記已言之矣

香祖筆記陸冰修昔在京師與施愚山梅耦長每夕必過予邸不冠不襪縱談至夜分始別去陸有絕句紀事云科眺到門衣不船船襟紐蓋方言也若杜子美天子呼來不上船自紀實事冷齋夜話以爲用方言則鑿矣

詩相風孫奕云相地名陸璣云河東有大鼠能人立交前兩脚於頭上跳舞善鳴按地志相州與河東相鄰荀子鼯鼠五

枝而窮本草廣雅皆謂螻蛄一名鼯鼠易晉如鼯鼠孔穎達
正義引蔡邕勸學篇云鼯鼠五能不成一技荀子云並爲螻
蛄也

榕城書肆有虹橋板一片色黝而澤文理堅栗發聲清越材
中琴瑟云產武夸山中不辨何木也興化林穆之王賦虹橋
板行記其事

西域種羊或云以皮肉埋地或云以脰骨率用初冬季春未
目其詳見於異物志刻溪漫筆諸書吳立夫淵穎集有波斯
國種羊皮書褥歌又元僧楚石詩自言羊可種不信繭成絲
予嘗考之不自立夫楚石始也北齊高昂詩隴種千口羊泉
連百壺酒朝朝圍山獵夜夜迎新婦形諸歌詠其來久矣雙
槐歲鈔以骨羊草馬作對云雲南越賧故地之西多薦草產

善馬始生若羔歲中紐莎縻飲以米藩七年可御日馳數百

里世稱越賤駿見唐書

周要危林云太平廣記引談駿作瓏種千口半詩紀詩所乃云千口牛誤也

宗柎附識勇參云按樂郊私語種羊一條與山人所記約略相同又據林國有羔羊生於上中然其胎與地連剖之則死唯人若甲走馬擊鼓駿之其羔鳴鳴而胎絕便逐水

草見集

異記

雙槐歲鈔云東粵順德縣有地曰壽星塘山水幽勝有物名
赤蝦子如嬰兒而絕小自樹杪手相牽掛而下笑呼之聲亦
如嬰兒續續垂下甫至地而滅俗謂蓬萊仙女遺類也諾皋
記載昔有姚汪王三姓食都樹皮餓死化為鳥都皮骨為猪
都婦女為人都皆棲大樹即如人形而絕小男女白相配偶
在樹根者名猪都在樹尾者名鳥都在樹尾可攀及者名人
都左腋下有一鏡印闊二分其禁有山鵲法打土壘法食其巢
味如木芝有術者周元大能禹步為鴈術以左合赤索圍木

斫之樹仆剖其中三都皆不能化乃執而烹之周侍郎櫟園詩人都擁樹形同鳥是也又月山叢談載廣西思恩縣近邨樹杪有二人約長一尺五寸武人裝束白竹纏芒屨其行如飛此當卽赤蝦子之類蓋閩粵皆有之

唐韋蟾岳麓道林詩靜聽林飛念佛鳥細看壁畫默經馬按王得臣塵史安陸有念佛鳥小於鸛鶴色青黑常言一切諸佛宋元憲詩鳥解佛經言張齊賢守郡日爲作古詩一篇

塵史謂野有死麕之詩曰舒而脫脫兮無感我帨兮婦人服飾獨言悅者按內則注云悅婦人拭物之巾也居則設於門右佩則分之於左常以自潔之用也古者女子嫁則母結帨而戒之

徐太室徑定野有死麕爲淫詩甚有理

西域哈烈撒馬兒罕諸國多風磨其制築垣牆爲屋高處四

面開門門外設屏牆迎風室中立木爲表木上用圍置板乘風下置磨石風來隨表旋動不拘東西南北俱能運轉風大而多故也耶律文正詩衝風磨舊麥懸杵搗新粳又有風扇於帳房中高懸布幔下多用頭髮當面設繩索牽動自然有風不用揮扇也見陳誠西域錄錄載沙塵海牙在撒馬兒罕之東五百餘里有草春生秋死臭氣逼人取其汁熬以成膏即阿魏也又有小草高二三尺許遍身棘刺葉網如藍清秋露降綴於枝幹甘如飴蜜可熬爲糖名達那古賓即甘露也

姑孰青山李白墓生蘆其形如筆號筆蘆績溪舒頤道原有

詩云筆蘆蕭蕭青山巔頤元末人有華陽文集七卷

昔見朱竹垞簡討詩云捉臥甕人選新格初不解及觀通志有趙昌言捉臥甕人格及採珠局格旋基格金龍戲格等名始悟所謂

本草圖經人獲一桎至四桎各五葉今遼東采獲者識其苗

不語急以緯簾

涼帽名

覆其上然後集人發掘則得葎甚多否

則苗條不見發之無所得禮斗儀云下有人葎上有紫氣理

或然也康熙戊午予直內庭曾應制賦御苑人葎詩親

觀其樹唐人詩詠人葎者絕少唯韓翃云上黨人葎五葉齊

溫岐云松刺流空石差齒烟香風軟人葎藥

并錄六

池北偶談

人葎詩昔人甚少前已言之適讀唐詩紀事又得段成

式求人葎詩云少賦令才猶強作衆醫多失不能呼九莖仙

草真難得五葉靈根許惠無周繇遺柯古人葎詩云人形上

品傳方志我得真英自紫團慙非叔子空持藥更請伯言當

古夫于亭雜錄作審

細看又高麗采參讚云三椹五葉背陽向陰欲來求

我椹樹相尋椹音賈葉似桐

雜錄注中有案周詩殊劣伯言非抗字亦誤也凡十三字

古夫于亭雜錄

錢起紫葎歌并序紫葎幽芳也五葩連萼狀飛禽羽舉

俗名之五鳥花故山道人蘭若豐此藥校書劉公詠歌俾余
繼作遠公林下滿蒼苔春藥偏宜閒石開往往幽人尋水見
時時仙蝶隔雲來陰陽彫刻花如鳥對鳳連雞一何小春風
宛轉虎谿旁紫翼紅翹翻霽光貝葉經前無住色蓮花會裏
暫留香蓬山才子憐幽性白雪陽春動新詠應知仙卉老烟
霞莫賞天桃滿蹊徑

全上

皮日休謝人夢詩神草延年出道家是誰披露記三桎
開時的定涵雲液斲後還應帶石花名士寄來消酒渴野人
煎處掇泉華從今湯劑如相贈不用金山焙上茶陸龜蒙和
五葉初成椶樹陰紫團峯外卽雞林名參鬼蓋須難見材似
人形不可尋品第已聞升碧簡携持應合重黃金殷勤潤取
相如肺封禪書成動帝心

居易錄

予頃搜人獲故事欲作人參譜未暇雜見於池北偶談

居易錄卷中讀坡集又得數篇其一紫團參寄王定國

帥中山時作

其小圃五詠第一首爲人參

居惠州作

又次韻表兄程正輔同遊

白水山云恣傾白蜜收五稜細斲黃土栽三桮自注云正輔

分人參一苗歸種韶陽

古夫子亭雜錄

東坡以紫團漫寄王定國詩谿碣土門口突兀太行頂

豈唯團紫雲實自凌倒景剛風被草木真氣入茗穎舊聞人

銜芝生此羊腸嶺穢穢虎豹羆蹙龍蛇癭蠶頭試小嚼龜

息變方騁矧予明真子已造浮玉鏡清宵月挂戶半夜珠落

井灰心寧復然汗喘久已靜東坡猶故日北藥致遺秉欲持

三桮根往侑九轉鼎爲予置齒頰豈不賢酒茗

全上

東坡小圃五詠人參一首上黨天下脊遼東真井底元

泉傾海腴白露灑天醴靈田此孕毓肩股或具體移根到羅
浮越水灌清泚地殊風雨隔臭味終祖福青樞綴紫萼圓實
墮紅米窮年生意足黃土手自啓上藥無炮炙齧齧盡根柢
開心定魂魄憂患何足洒糜身輔吾軀既食首重稽

附錄古夫于亭雜錄引五雜俎云人夢出遼東上黨者最佳頭面手足皆具清河次之高麗新羅又次之今生者不可得見其入中國者皆繩縛蒸而夾之故上有夾痕及麻線痕新羅參雖大皆數斤合而成之其力反減擇參唯取透明如肉及近蘆有橫紋則不患其偽矣又云王介甫曰平生無紫團參亦活到今日案紫團上黨山名也本草及唐宋已來皆貴黨參今唯貴遼東及高麗產佳者每一兩價至白金五兩而上黨每一斤價止白金二錢近人參驟貴始稍以黨參代之每一斤價至白金一兩有奇而購之亦不易也

易也
宗枬附識近日參價十倍曩時佳者每一兩價幾百金矣貧人固無由購得唯富貴家不問所患何症輒以此味爲君醫者漫無定見亦復宛轉從之冀以月功而委咎不思參善妄投禍與烏附同烈奈之何哉

治安策今民賣僮者爲之繡衣絲履偏諸緣又云白縠之表
薄紕之裏縫以偏諸服注曰如牙條以作履緣顏曰偏諸若

今之織成以爲要襪及標領者也杜詩客從西北來遺我翠
織成錢注引廣雅天竺有細織成宋書禮志諸織成衣帽錦
帳純金銀器雲母從廣一寸以上皆爲禁物高麗史獻織成
衣襖弓劍按子美詩題乃太子張舍人遺織成褥段蓋褥帳
衣帽要襪標領皆有織成而偏諸以爲衣履之緣者乃織成
之一耳

錢舜舉折枝牡丹一卷有蜀郡桑門公實悟光題云三月江
南媚景天姚黃魏紫鬪爭妍那知十丈將軍樹却在青城古
洞前自注云青城山丈人觀前牡丹二株一高十丈名大將
軍一高五丈名小將軍

并錄一

池北偶談高淳縣花山有白牡丹歲開數枝種非人力亦無恒所
有折者輒得疾施愚山詩云空山石疊疊獨立天風吹攀條

莫敢折含芳貽阿誰

附錄居易錄高淳縣丹陽湖之南花山有白牡丹巖開不過五枝七枝香聞十餘里散生石罅中移山下人家輒不活山南有孔家邨孔氏聚族於此每山上花時邨中異香彌月不散又云曹州五色牡丹天下第一居人於花園種植左牡丹右芍藥則花繁盛反是則不花亦不繁又池北偶談曹州牡丹品類甚多先祭酒府君紫荊購得黃白綠數種長山李氏獨得黑牡丹一叢云曹州止諸生某氏有之亦不多得也又云館陶人家有墨芍藥與曹州黑牡丹皆異種又分甘餘話黃牡丹今亳州曹縣皆有之荷花則未聞有黃色者墨莊漫錄云京師五岳觀凝祥池有黃蓮花甚奇僅見於此

鄆縣東三十里秦渡鎮卽文王豐邑故地有靈臺址傍有靈沼周數十頃沼中產黃蓮花然不常見又有安石榴一株傳爲漢上林種不時結實鄆卽上林故地也縣多竹園有詩竹莖短而葉大堅厚土人以代箋幅

已上池北偶談

西溪叢語宋姚寬撰鵠鳴館舊刻陶詩讀山海經第十二篇云鵠鵠見城邑其國有放士經云拒山有鳥其狀如鵠而人手其音如痺其名曰鵠其鳴自號見則其國有放士此書首

尾無序不知刻者誰何其云鵠鳴殆正嘉間朝士之被放逐

者歟

鵠尾文

蝎子草卽杜詩所云其毒甚蜂蠆者吳若注藝草是也一名山韭觸之如蠆尾之螫人今城郭彌望皆是又有蠆子者蚊蠆之屬元微之蠆子詩序云黑而小不礙紗縠夜伏晝飛嚙人成瘡秋夏不愈膏楸葉傳之則差聞柏烟麝香卽去此二物蜀地之最可憎者

隴蜀餘聞

嘗疑神農嘗百草目數十死不識以何解之讀元人白湛淵演雅有云草食押不蘆雖死元不死未見滌腸人先聞棄簣子注言漠北有草名押不蘆食其汁立死然以他藥解之卽蘓癸辛雜識云回回國之西數千里產一物極毒名押不蘆全類人形若人參之狀李肇國史補云南方有鳩之地必有

犀牛有水弩之處必有鷓鴣及生可療之草物固有相制者如此但神農何以預知而預儲之耶

齊民要術引廣志曰東墻色青黑粒如葵子似蓬草十一月熟出幽涼并烏丸地河西語曰貸我東墻償我田梁魏志曰烏丸地宜東墻能作白酒憶昔龔端毅公飲餞董御史玉虬之隴右道同人分杜甫秦州詩爲韻鄢陵梁御史哲次分得墻字座客皆難之未有憶及此者信強記之難也許彥周詩話恨賦七夕詩押尼字不記佛書烏鵲爲芻尼亦此類趙師異號東墻鳥曰雄雌獸曰牝牡然牝雞之晨雉鳴求其牡見于經文者亦互用高麗史辛禍傳遣密直副使張方平獻歲貢雄馬十五匹雌馬三十五匹馬亦得稱雄雌也古詩云雄兔腳撲朔雌兔眼迷離詩曰雄狐綏綏

偶約座客賦琴魚詩姜宸英西溟吳麀仁趾魏坤禹平作皆

佳姜詩云枯藤雙倚退食餘折柬相召一事無坐中唯有城

西朱竹垞且喜南榮日曝書軟語移時動深酌仰看參橫挂屋

角閒微瑣細到蟲魚何盤遙數江南樂不見涪翁句春網薦

琴高千里誰封裹致此溪中毛神仙風味遺爾雅自得新詩

更蕭灑中丞先有長句儂家本住扶桑東扶寸的樂連叔筒海艷之味

將無同海艷南東產醃肖此魚勿訝鄉物輕比擬爲公多致爲佳耳他日

徵公海艷詩但言此心已馳彼吳云憑誰封寄到京華下飭

猶憐道路賒怪底人誇風味美年年春漲食桃花魏驀山溪

詞云桃花潭近千尺揉藍早一曲是琴溪過清明腥風吹到

仙人去後水族也留名鱗影細浪痕圓翠網都收了騎鯨

無分客裏銜杯好玉腕忽擎來最堪憐小於白小脆能下酒

不用鱸銀絲除非並箭頭魚風味輸多少按賓退錄云涇縣東北二十里有琴溪溪側有石高一丈曰琴高臺有廟存焉溪中別有一種小魚相傳琴高投藥汁所化號琴高魚歲三月數十萬一日來集舊以入貢乾道中始罷前輩多形之賦詠梅聖俞歐陽文忠公王禹玉皆有和梅公儀琴高魚詩梅詩云大魚人騎天上去留得小鱗來按觴吾物吾鄉不須念大官常膳有肥羊歐云琴高一去不復見神仙雖有亦何爲溪鱗佳味自可愛何必虛名務好奇公儀元倡未見禹玉人不足道詩句亦平平歐梅大手二絕句乃僉父面目以今視昔孰謂古今人不相及耶錄又記汪彥章些字韻古詩頗勝諸作

宋時士大夫多重究墨余已記之前卷讀范宣公集有究墨

詩云誰熱長松製作勤輕煤勻膩雜蘭薰中疑元石無纖翳
外似靈犀有密紋溪石乍研浮紫翠蜀箋試寫落烟雲會將
點畫傳青簡千古忠邪爲爾分忠宣公不以詩名五言如溪
風消酒力烟樹入春愁最工

附錄居易錄吳氏墨經云充沂登審之山總謂之東山東山之松色澤肥膩性質沉重
品唯上上工則究州陳朗朗弟遠遠子唯進唯進與易水奚氏並稱又云王氏談錄李
廷珪墨凡數等其作下邳之邳者爲上作圭潔之圭者次之作珪璧之珪者又次之其
云奚廷珪者最下又云南唐徐常侍鉉言常侍李超墨一挺長不過尺細才如筋與弟
錯共用之日書約五千字十年乃盡超與常侍同時其珍重已如此宜北宋諸公得其
殘圭斷璧以爲希有也又香風筆記李文叔云客出墨一函其製爲壁爲丸爲手握凡
十餘種以錦囊之說曰李廷珪爲江南李國主父子作墨絕世後二十年乃有李承晏
又二十年有張遇自是無繼者余用薛安播墨三十餘年皆如吾意不覺少有不
不知所謂廷珪墨者用之常何如也又云宋時製墨名家有潘谷陳瞻張谷又有常山
張順九華朱觀嘉禾沈珪金華潘衡宣政間有關珪關珪梅鼎張滋田守元曾知唯桐
柏張浩河東解子誠韓侂昇可與李氏父子相
甲乙又云羅文龍墨如空青水碧瑯琊木難
宗權附識靜志居詩話古人製墨率用松烟漢取諸扶風晉取諸廬山唐則易州上黨
自李超徒歛張谷徒夥皆世其業其後耿仁遂高慶和戴彥衡吳滋湖智率多歛人明
則羅文龍少華邵克己格之程大約君房輩咸以製墨稱而方于魯所製最夥凡三百
八十五式刊成圖譜會上呈乙覽勇參云查浦職聞楊用修云元時米萬初墨純用松

烟蓋取二三百年摧朽之松精英不可泯者非常松也近世多用桐油烟姿媚而不深重宣和曾以燕合油搜烟爲墨金章宗購之墨一兩黃金一觔欲傲爲之不能乃以張遇巖香小團爲畫眉墨亦精思按搜字從傳鈔之本疑有譌又集坪凡嘗語余明丁雲鵬吳去塵亦善製墨云

廣南人以荳爲茶予頃著之皇華紀聞聞道鄉集有張糾送吳洞荳絕句云茶選修仁方破碾荳分吳洞忽當筵君謨遠矣知難作試取一瓢江水煎蓋志完遷昭平時作也又有藟荊菜詩云丹桂葉舒推重碧木蘭花發避深紅皆可入南方草木狀也李仲賓學士言交趾茶如綠苔味辛烈名之曰荳或卽荳字見研北雜志

附錄居易錄爾雅曰茶苦菜可食齊民要術引詩義疏曰山田苦菜甜所謂董茶如飴又爾雅曰檟苦茶郭璞注云樹小似梔子冬生葉可煮作羹飲今呼早采者爲茶晚取者爲茗一名薺蜀人名之苦茶齊民要術引博物志曰飲真茶令人少眠前人乃謂古無茶字以茶卽是茶大謬又皇華紀聞粵俗好用荳葉雜茶烹飲號爲茶荳荳產粵西入口味苦頃之則齒頰微甘畧如橄欖案字書云荳都鵬切金荳草名又云茶樹二二三月作花花似荔枝支粵人采其葉爲茶非真茶也五代王闕時甘露殿有茶樹二樹茂蔭婆宮人呼爲清人樹或卽此粵唯西樵產茶云唐人曹松流寓此山教人種茶山中人至今業之

生男胎衣名紫河車別有草藥亦名紫河車生楚蜀峽山中
范石湖詠之云綠英吐弱線翠葉抱修莖蠹如青旄節草中
立亭亭根有却老藥鱗皴友松苓詩見石湖集

吉贛間鳥有名功曹主簿者故子過泰和有詩云木客山都
人比舍功曹主簿鳥多名茅亭客話云孔雀名都護酉陽雜
俎云齊郡函山有鳥名王母使者

宗柝附識記事珠載花鳥別名惜不詳其出處未可據依聊綴其名之佳者如左
曰仙客曰山君曰軒郎曰還丹使曰九皇處士曰引玄道士曰孔雀曰南客曰鸞友曰
文禽 鸞鸞曰雪客曰春鋤曰獨春曰鳳樓妻曰鳳標公子曰猿鼎女子 鸞曰搏黍
曰趨時鳥曰黃栗留曰凌霄君曰金衣公子 鸞曰嘉賓曰殊翁曰駕鸞曰錦字曰書
空匠者 鸞鸞曰隴客曰慧鳥曰鶯哥曰綠衣使曰武仙郎曰雪衣娘 燕曰社君曰
鳥衣王 鸞曰芻尼曰青喜 鸞曰海翁曰婆娑兒曰碧海舍人 杜鵑曰觀自在
白鷗曰開客曰元素先生 鸞曰會稽公曰戴冠郎曰長鳴都尉 翡翠曰繡衣曰碧
衣女子 鸞曰飛奴曰柳羽佳人 鳥曰黑鳳麗曰鳥中曾參 鴨曰青頭道士 啄
木曰采藥使 又查浦輯聞收香鳥一名樹花鳳又名
么鳳又蜀嘉定州有鳥名雨道士見陸深蜀都雜抄

爾雅購蒲葦郭璞注蒲葦蒿也生下田初出可啖江東用

詩話卷十六 名物

三

羹魚故

舊尾文無故字

坡詩云羹蒿滿地蘆芽

舊尾文作牙

短正是河豚欲上

時七字非泛詠景物可見坡詩無一字無來歷也

非錄一

漁洋詩話

坡詩羹蒿滿地蘆芽短正是河豚欲上時非但風韻之

妙蓋河豚食蒿蘆則肥亦如梅聖俞之春洲生荻芽春岸飛

楊花無一字汎設也

附錄居易錄天津河豚最多然唯吳人嗜之雜其毒者亦不少予所見藥文敏方調陳

太史維松皆以食此致病陳頭目悉腫至不可辨識昔人云不食馬肝未為不知味乃

文人學士知而故蹈之不可解也陶九成錄方或龍膈浸水或至寶

丹或橄欖皆可解又槐花微炒與乾臘脂各等分搗粉水調灌即效

宗杲附議吳中正月鏡尚河豚春前臘雪抽綿則食者更多以其毒差減故便烹飪必

屬良庖非可草草客有劇嗜者語余曰魚族之美曰肥曰鮮曰脆江鱗尚矣一食河豚

則彼亦同嚼蠟矣余固不知其味最喜曝書亭集句云客來疾呼莫莫莫啜當投界煩

丁寧又云入脣美味縱快意累客坐久心方寧妙寫情事盡所不到然聞中亦甚者須

以真金汁灌之猝乍不得非糞水莫解所謂神方解厄本草缺備有

諸辭慈然汝秋錦示識之詞其意切矣不特語帶幽默令人絕倒也

元微之詩領我無衣搜盡篋本集注蓋草名今刻作畫篋字

形之謫也段柯古連句詩蝶閑移忍草忍草雜蘭蓀忍皆作

總

熊有綠者獠獠取爲鄣泥塵不敢揚威懾虎豹樂府云郎眠綠熊席又溫柔藉綠熊

藤江有鯖魚大者餘百斤其膽治目功比空青魚大膽小者上魚大膽大者中上魚小膽大者中下漁者得魚官稅其膽始敢市其僞者以鮓膽灌黃藤膏爲之鄜詩云金環殉吉鵲花縣稅鯖魚

延綏鎮新誌花木類有後姚婆一莖作蓓蕾開花五六瓣翠色俗云舜母亦曰虞美人因虞字而傳會殊謬按虞美人卽鶯粟花俗名米囊有千瓣五色又名滿園春通雅曰虞美人有吳蜀二種碧雞雜志言桑景舒作虞美人曲而此花輒動先王父方伯公羣芳譜云虞美人草獨莖三葉葉如決明一

葉在莖之端兩葉在莖之半相對人或歌虞美人曲則葉動如舞又名舞草出雅州宋曾慥詩芳心寂寞寄寒枝舊曲聞來似斂眉哀怨裴回愁不語恰如初聽楚歌時今詩餘調有虞美人古今通詠虞姬事舜母之名妄矣

通雅篇謂之蕩又為蕩北人謂之孤蕩音如孤都

即宋景文所云孤都也山東方言尚云孤都也

宗補附識記事珠 牡丹曰貴客曰花王曰風姑曰花形史曰花師傳曰花宮闈曰木芍藥曰百葉仙人曰蓬萊相公 芍藥曰嬌客曰餘客曰近客曰花相曰艷友曰牡丹近侍 桂曰仙客曰文客曰岩客曰癡客曰仙友曰山友曰花仙 梅曰清客曰清友曰奇友曰花御史曰花中巢許 茶蘼曰雅客曰才客曰韻友曰玉友曰沉香客友 薔薇曰野客 瑞香曰佳客曰閑客曰殊友 茉莉曰遠客曰御客 梔子曰禪客曰禪友 海棠曰蜀客曰艷客曰名友曰花貴妃曰花命婦曰花中神仙 丁香曰素客曰情客 菊曰壽客曰佳友 蓮曰淨客曰淨友曰水芝曰芙蓉曰芙蓉曰梅弟曰凌波仙曰妙法華 萱曰歡客曰兒女花曰獨立仙 辛夷曰木筆曰迎春 芙蓉曰木蓮曰拒霜 紫薇曰詞客曰不耐灑花 凌霄曰勢客 素馨曰韻客 鳳仙曰羽客 木芙蓉曰醉客 楊花曰狂客 玫瑰曰刺客 月季曰瘦客 桃花曰妖客 含笑曰侯客 勇參云案三餘贅筆宋張敏叔名景修禮部郎中吳中人以十二花為十二客各有詩曾端伯以十花為十友各為之詞似即記事珠所本中唯蘭為幽客茉莉雅友此條不載餘悉同

滇南舊無鴻雁順治庚子始有之千百爲羣皆西向飛去自是年年有之不見北鄉者右見滇志然升菴集有泛滇池見新雁詩

戶部主事孔尚任東塘有龍卵聯句云燕市得一卵其堅如石圓尺有三寸鵝子形色類漬象牙徧體黥點有紋蟠結如蛟螭狀古云龍蛇卵有黥點蛇圓龍長龍卵經火不燬試之良然

今京師臘月卽賣牡丹梅花緋桃探春諸花皆貯暖室以火烘之所謂堂花又名唐花是也案漢書召信臣傳信臣爲少府大官園種冬生葱韭菜茹覆以屋廡晝夜爇蘊火待溫氣乃生唐人詩內園分得溫湯水二月中旬已進瓜蓋漢唐以來皆然

附錄香祖筆記宋時武林馬脂藏花之法紙糊密室鑿地作坎覆竹置花其上糞土以牛糞疏黃然後置沸湯于坎中候湯氣熏蒸則扇之經宿則花放今京師園丁亦然予嘗以冬月寄諸盆花約明年花樹不敗則酬其直唯桂花不能如舊西湖志餘謂桂必清涼而後放法當置石洞岩竇間暑氣不到處鼓以涼颼乃開今與桃梅牡丹之屬同置暖室地窖宜其不殖也此亦格物者所當知

宗柟附識勇參云宋王曉道山清話立春日於游根上接牡丹花不出一月即爛漫又云梅花初折宜火燒折處固滲以泥牡丹初折宜燈燃折處待軟乃歇葉蘭花初折宜搥碎其根極少許荷花初折宜亂髮經根取泥封發海棠初折薄荷包根入水除此數種可任意折插牡丹花宜蜜養密仍不壞竹枝戎葵金鳳芙蓉用沸湯插破葉乃不萎

白居易詩嫁得黔婁作夫壻可能還寄蜀茶來謂蜀產如蒙頂茶之類也然聞有蜀茶一種樹似山茶高者丈餘花開以二三月大如牡丹色皆正紅但香稍不逮耳

已上居易錄

今京師宴席最重鹿尾雖猩脣駝峯未足爲比然自唐已貴之陳子昂塵尾賦云卒網羅以見逼受庖割而罹傷豈不以斯尾之有用而殺身於此堂爲君雕俎之羞則君金盤之寶

云云若六朝已來則以麀尾爲談柄耳未聞充盤俎也耶律

楚材西域詩亦以鹿尾駝蹄作對

并錄一

古天子
亭雜錄

京師極貴鹿尾予向引陳子昂賦耶律楚材詩證之考

酉陽雜俎所記乃不始於唐魏使崔劼李騫在中丞劉孝儀

坐孝儀曰鄴中鹿尾酒肴之最劼曰生魚熊掌孟子所稱雞

跖狸脣呂氏所尚鹿尾乃有奇味竟闕載籍騫曰鄭氏稱益

州鹿痿但未是尾耳觀此則自南北朝已貴之

鹿痿之義未詳

附錄雜錄又云余前言鹿痿二字未詳適閱王伯厚漢制考引周禮麀鹿魚爲菹注云

今益州有鹿痿者近由比爲之矣疏益州人將鹿肉畜之殘爛謂之鹿痿也殘於僞反

又香祖筆記能掌最難熟故楚靈王請食熊蹯而死明泰府王孫不羈云用草繩匝掌

煮之則易熟燕窩名金絲海狗云海際沙洲生蠶螺骨有兩肋堅潔而白海燕啄食之

肉化而肋不化并津液吐出結爲小窩唧飛渡海倦則棲其上海人依時拾之以貨紫

色者尤佳湖海搜奇云出廣東陽江縣乃海燕採小魚營巢故名燕窩閩小紀云燕窩

有烏白紅三種唯紅者最難得白者能愈疾疾紅者有益小兒痘疹懷園又云參皆益

人沙元苦參亦燕補海參得名亦以能溫補故也生于土爲人參生于水爲海參故海

參以遼海者爲良又居易錄海蠶大如蠶青黑色頂有一竅溫台人取置鼎中插竹

如林蠶食水草久之則緣竹而上自竅吐粉凝於竹末粉盡蠶入水死卽海粉也

予奉使廣州屢見紅鸚鵡又有五色者尤珍麗姚旅云滇中
多紅斑鳩又云曩宮中有黃鸚鵡屠長卿詩云一入雕籠奪
翠裳羽毛新得染鵝黃此與漢赤鴈朱鷺隋宦官劉繼詮獻
芙蓉鷗皆異物也

宗柝附識勇參云酉陽雜俎載唐明皇時有
五色鸚鵡性最靈張燕公表賀稱時樂鳥

石蛙音劫南越志云形如龜甲或云脚遇春雨則生花右丞詩

來經石蛙春春字非趁韻也古人字無虛設如此

從伯文玉諱與玟號能詩嘗有詠宋高宗一絕云千金空買
玉孩兒不得其解讀西湖志餘高宗嘗宴大臣見張循王俊
持扇有玉孩兒扇墜上識是舊物昔往四明誤墜于水者問
俊所從得對曰臣從清河坊舖家買得之詢舖家云得之提
籃人復詢之乃從候潮門外陳宅厨孃處得之詢之厨孃云

破黃花魚腹中所得也上大悅鋪家提籃人補校尉厨爇封孺人

宗傳案玉孩兒雖佳非寶玉天弓也失而復得殊無足異必欲究其所從來縱溫言論使而展轉致詢實擾民間重以校尉孺人之封則濫假名器其事更爲僞甚夫二帝未還兩河未復此乾坤何等時而乃喜小物之得存固已忘大體之必報矣龍鵠館詩未見其詳所誦殆於高宗有微辭乎

中牟南湖數十畝中有亭額以蒲盧爲張林宗觴詠地予過之易名墊巾按毛詩小宛疏云螟蛉桑蟲也果羸蒲盧也細腰土蜂謂之蒲盧郭璞爾雅注細腰蜂俗呼蠋螋若水中之蒲其根著在土而浮蔓多緣木故亦或謂之果羸是細腰水蒲得以互稱於命名之義無一可者不知當時義何居也

明大內英華殿供西番佛像殿前菩提樹二孝定皇太后手植也光祿寺志云英華殿四月八日供大不落夾二百對小不落夾三百對叔祖季木考功詩云慈寧宮裏佛龕崇瑤水

珠燈照碧空四月虔供不落夾內官催辦小油紅蓋紀此事也慈寧宮當作英華殿爲確并錄一

古夫于
學錄

明故事四月八浴佛日賜百官不落夾案萬歷中慈聖

李太后宮中祀九蓮菩薩四月供不落夾先從祖季木春象考

功詩云慈寧宮裏佛龕崇瑤水珠燈照碧空四月虔供不落夾內官催辦小油紅蓋故事四月供佛後卽賜百官不始萬歷也夾菽園雜記作莢

驪山集辨鳩逐婦一則云鳩逐婦乃感天地之雨暘而動其雌雄之情求好速也非逐而去之之謂歐陽永叔云天將陰鳴鳩逐婦啼中林鳩婦怒啼無好音非也

明天啓時內官多購異花種于臨幸之處有紅水仙蛺蝶菊番蘭柿之屬陳棕天啓宮詞云春風香艷知多少一樹番蘭

分外紅又云卽美人蕉

薜萄鮮方薜萄卽梔子也采嫩花釀作鮮最爲香美昔劉賓客饋白太傅菊苗薜蘆蕝鮮換取樂天六班茶二囊有詩載

集中

附錄此條前段越中筍脯俗名素火腿食之有肉味甚腴京師極難致偶閱安老懷幼方載芭蕉根有兩種一種粘者爲糯蕉可食取作手大片灰汁煮熟去汁再以清水煮易水令灰味盡取壓乾乃以鹽醬蕪荳乾薑熟油胡椒等研泥一兩宿取出焙乾畧槌令軟食之全類肥肉之味嫩蓮房去蒂去皮用新汲井水入灰煮泥如蕉脯法焙乾以石壓令扁作片收之十月以後取牛蒡根洗乾去皮用慢火少煮勿太爛硬者熟煮并搥令軟下雜料物如蕉脯法焙乾

揚州瓊花天下祇一株晏元獻守揚作無雙亭於其側宋德祐乙亥北兵至花遂不榮趙棠國炎有詩曰他年我若修花史合傳瓊花烈女中然山房隨筆所記仁宗慶歷中嘗分植禁中輒枯比載還則鬱茂如故又何說耶

附錄香齋筆記世言瓊花天下唯蕃釐觀一株故宋人作無雙亭于其側然元遺山續夷堅志云鄆縣南十里炭谷入谷五里有瓊花樹大四人始合抱逢閏卽花以初伏開

宋伏乃畫花白如玉中有玉胡蝶一高出花上花
落不著地乘空而起按此則不止廣陵有之矣

成宏間留都扇骨以李昭製者爲最見顧東江清集往徐健
菴司寇爲宮坊時贈予金陵仰氏扇子謝以詩有舊京扇貴
李昭骨之句翼日相遇朝班問李昭出處予但據東江集答
之後閱金陵瑣事乃詳李昭李贊蔣誠三人製扇骨最精徐
守素蔣徹李信修補古銅器如神恨昔者不能舉此應之信
彊記之難也

南園漫錄云桂有桂樹之桂有桂花之桂桂樹則楚詞桂酒
箇桂之類今醫藥所用取其氣味甘辛乃用其皮也桂花之
桂則詩詞所言今人家園圃所植取其香氣郁烈乃尚其花
也類書所載皆未別白雖白孔六帖亦然

溫飛卿以蒼耳子對白頭翁寧陽許襄敏公彬取作一聯云

道上鈎衣蒼耳子風前聒客白頭翁蓋其去國之作上句卽迷陽迷陽勿傷吾行下句卽違山十里蟪蛄之聲尚猶在耳之義

玉茗花海紅花皆山茶也古詩云淺爲玉茗深都勝大曰山茶小海紅都勝卽寶珠山茶

附錄香祖筆記勞山多耐冬花花色殷紅冬月始盛開雪中照曜山谷翺望皆是說者謂卽南中之山茶然花不甚大所云海紅花是也宗柎附識勇參云按柳亭詩話山茶小者曰海紅淺色曰玉茗深紅曰都勝又陵川詩注山茶大者曰月丹又大者曰照殿紅

吾家西第石帆亭玉版書屋多大竹常有小鳥翠色飛鳴其間大僅踰婦人釵梁物或結巢堅緻如罌罍似卽嶺南之翡翠也柳文暢有詠白蘋洲翡翠詩則不唯粵中有之矣李衛公有桐花鳳賦亦類此歸田錄載宜春庫有翡翠錢一隻形似碧玉乃所謂翡翠屑金者非此鳥之羽也

蜀道有花名龍爪花色殷紅秋日開林薄間甚艷又有蟲其聲清越如擊磬然予壬子初入蜀曾有絕句云稻熟田家雨又風枝枝龍爪出林紅數聲清磬不知處山子晚啼黃葉中雪峯百里間多竅竹筍味甚美寺衆自三月至六月猶饜飫是義存禪師手植余考戴凱之竹紀六七十種而無竅竹先方伯贈尚書府君譜竹尤多亦不之及近杭僧竅堂有詩名其自號始取諸雪峯云竅音豁字書云空大也

人

上金謂之紫磨金劉迎詩紫磨金餅噉扶桑迎字無黨萊州人

宗傳附識水經注初楊適母懷身夢人鋪楊邁金席與其兒落金席上光色起昭晰麗曜華俗謂上金爲紫磨金夷俗謂上金爲楊邁金楊邁者蓋以其夢爲嘉祥而名之耳

葉少蘊言唐及國初京師皆不禁打織五代始命御史服裁帽淳化初又命公卿皆服之既有織又有帽故謂之重戴祥

符後唯親王宗室得用繖其後通及宰相參政今裁帽席帽
分爲兩等中丞至御史六曹郎中於席帽前加全幅皂紗僅
圍其半爲裁帽員外郎以下則無之爲席帽按此製似古婦
人髻離今眼紗之類而名爲裁帽不可解又按張洎題右丞
畫孟襄陽吟詩圖云襄陽之狀峭而瘦衣白袍靴帽重戴乘
欵段馬一童總角負琴而從觀其圖乃帽上加皂色幅巾垂
於肩後但不似髻離掩面耳殊近裁帽之製而謂繖與帽爲
重戴豈唐宋所謂重戴又有殊異耶

太平清話云朱竹古無所本宋克仲溫在試院卷尾以朱筆
掃之故張伯雨有偶見一枝紅石竹之句然閩中實有此種

紅如丹砂

已上香祖筆記

金陵瑣事云神樓乃劉南坦尚書製爲修煉者用竹

香祖筆記
無竹字

簾編成懸於屋梁僅可弓臥其上下收放之機皆自握之不

煩筆記須他人如陶靖節籃輿之類筆記作似陶靖節之籃輿在用簾編成句下文徵仲為

寫神樓圖筆記作寫其圖無為字神樓字諸詞人多詠筆記有歌字之皆不得其肯余筆記

無余按虞山列朝詩傳筆記作小傳云劉筆記無劉字清惠好樓居而力不能

構文徵仲作神樓圖以遺之楊升菴筆記作又升菴先生後神樓曲序亦

云筆記無云字然筆記有曲中仙人五城十二樓等句亦未詳其形製何如凡十九字皆所謂筆記作云不得其旨者

也漁洋詩話

陸魯望詠木蘭花詩云幾度木蘭舟上望不知元是此花身

述異記七里洲有魯班刻木為舟至今在洲中或以為李義山詩

唐文宗一日問宰相古詩云輕衫襯跳脫跳脫竟是何物宰

臣未對上曰即今之腕釧也真誥有斲栗金跳脫是臂飾又

宣宗嘗賦詩上句有金步搖遣求進士對之溫庭筠以玉條

脫爲對宣宗賞焉二事皆見唐人小說或是一事而傳聞異

辭耶

上條出盧氏雜記
下條出北夢瑣言

萊州府城東北滿家亭子有水石之觀地產石色理如碧玉
瑩如水晶可爲印章但苦質脆耳先兄考功客萊時余寄詩
云雁門石硤谷崑山玉子岡古人風流入筆墨每恨道遠難
携將滿家亭子水清妙試采瑤華來錦囊兄有答詩載集中
南陽門人李鴻常貽余墨晶印章色如點來而溫潤如玉尤
可愛余刻其文曰茗柯有實理鴻名相文達公裔孫也

附錄香祖筆記印章舊尚青田石以燈光爲貴三十年來閩壽山石出質溫栗宜鐫刻
而五色相映先采四射紅如赫爾黃如蒸栗白如珂雪時藏尚之價與燈光石相埒近
斧鑿日久山脈枯竭或以芙蓉山石充之無復寶
色其直亦不及壽山五之一矣二山皆在福清

宗補附識兄寒坪云壽山石以田黃爲貴其次之而紅綠者最難得卽竹垞詩中所
謂桃紅艾葉綠者是也勇參云破葉堂詩自注元末諸暨人王冕自稱煮石山農始用
花乳石刻私印又云壽山石產田中者最佳大洞所產亞於田石今所用者皆出芙蓉
岩愚按凍石尚矣閩高唐事江郎集似石之最佳者隨其色澤統名曰凍非專指一種

也近有最下者曰遼東色嫩綠而質極燥或以售欺亦甚易辨唯吾杭昌化所產石質明瑩通體殷紅較珊瑚更勝然如優鉢曇花不復常觀矣

馬人見韓詩衙時龍尸集上曰馬人來注馬人出後漢書馬

援傳又馬人繁昌山名在銅官鄉山多奇石形肖人馬宋人

詩霧浴千峯失馬人

附錄居易錄王彪之問中賦云簣簣而人奔民要術注云簣簣竹節中有物長數寸似人形相傳云竹人竹人之名較楓人尤奇又五色線言馬均削竹作人能語須臾而雨

是別一竹人也

孫季昭釋詩鼃勉從事句云鼃鼃屬也周禮蝻氏掌去鼃鼃

注謂鼃為蝻鼃耿鼃也蛙鼃之行勉強自力故曰鼃勉如猶

豫狐疑之類此說甚新

宗枬附識山人世業毛詩凡有考辨以序說為宗集傳為非即其援證紛綸大指總不越此然自屈經解無庸闢入間有循流溯源為詩家積石之導已錄數則列之前卷至於名物箋疏或具別解後來亦復常用如此卷所采博聞者或有取諸

稻花豆花麥秀黍離皆以入詩蕎麥為五穀最下之品而其

花殊嬌艷唐人詩云日落鴉飛散滿庭蕎麥花蕎麥自田野
間物詎可植之庭中此較遼華泉庭中何所有有萱復有芋
尤可議白樂天詩自起開門望野田月明蕎麥花如雪差不
謬耳已上古夫千亭雜錄

宗枏附識北地蕎麥是處有之余少客河南密縣偶步村莊離落間常見此花竊謂詩
人托物書懷若近若遠未須泥定何字真自詩一劍論也玩唐句日落鴉飛明寫荒寒
之景此中意境蕭寥豈其廣庭曲砌適爾自適者耶且花殊嬌艷何渠不可
植之庭中耶弇州議邊詩半豈庭中佳物云云持論稍拘前賢亦偶同也

畫壤銀蕤邑義塘瓜剖之色如黛而味甘如蜜余昔寄同年
劉考功公馭句云側聞西湖水嫩綠如瓜瓢用此世必疑瓜
瓢無黛色者矣

名勝志太原府城內有巨鐵常露其頂掘之則深入不出曰
鐵母今有鎖鐵祠西燕游并州題詩云塊爾留其質蕭然覆
古苔氣應千象緯地已絕塵埃知有藏鋒用無勞大冶開風

胡今已遠珍重寶刀材

已上分甘餘話

帶經堂詩話卷十六